

四庫全書

子部

欽定四庫全書

子部

白孔六帖卷五十一

詳校官中書臣閔思毅

負外郎臣牛稔文覆勘

總校官知縣臣楊懋珩

校對官助教臣胡予襄

謄錄舉人臣吳之承

欽定四庫全書

白孔六帖卷五十一

唐

白居易 原本

宋 孔 傳 續撰

大將

偏將

威名將

儒學將

宗族從軍

軍旅

出征

發軍

祭師

接戰

軍政令 十一

大將 一

白上將軍處右

晉謀元帥用郤縠

傳晉侯作三軍謀元帥趙衰曰郤縠

說禮樂而敦詩書乃用郤縠將中軍

予王之爪牙

握兵之要

帥師者受

命於廟受賑於社

傳

建牙設壇而拜

漢高祖擇日齋戒設壇場具禮拜韓信為

大將

鑿山門授鉞

孫吳之法

韓彭之功

位列四七

軍盈十萬衛霍

寄重旌分閫外之憂

杖節

天下危注意於將

陸賈曰

將

軍忘家

推轂

漢書王者遣將跪而推轂曰自閫以外將軍制之

握兵權

方名

之材

方叔召虎

啓什伍之行列四七之任

禮什伍部曲也

幕府

衛青以幕為府

轅門

以車轅為門

三公之上

後漢和帝以竇武為大將軍位在三公之上

不趨不名

大將軍入朝不趨劔履上殿諧奏不名式是百辟

辭第

霍去病為嫖姚將軍上為治第辭曰匈奴未滅臣無

以家

絕席

漢王常為大將軍與諸將絕席

尚左

禮記軍尚左注左陽也陽主生將軍有決勝之策左

將軍為上貴不敗績也

赳赳武夫公侯干城

詩

時維鷹揚

詩尚父也

君子聽鼓聲則思將帥之臣

禮

命為軍師

師之耳目

在吾旗鼓

言三軍視大將旗鼓以進退也

帥賤人慢之懼不用命焉

楚昭王問

帥子轍曰右尹羌車與左史老皆可用也子高云云

使仁者佐賢者

穀梁晉殺陽處父君漏言也晉

將與狄戰使狐夜姑將中軍趙盾佐之處父曰古者使仁者佐賢者今趙盾賢夜姑仁其不可乎公語夜姑夜姑遂殺處

請美田宅

泰使王翦將兵十萬伐荆翦請美田宅至關又使請善田或曰將軍乞貸亦甚也翦

父曰今空國甲士委我請子孫業以自堅爾竟虜荆王

斬君使之右

史田穰苴為大將軍將斬莊賈景公

使馳救穰苴問軍吏曰馳三軍如何曰當斬穰苴曰君使不可戮乃戮僕車之右

斬諫者

趙使趙奢救韓

堅壁不戰秦兵鼓譟屋瓦皆振有軍候一人言急救立斬之後云云奢賜號馬服

殺妻

吳起為魯將齊攻魯

起妻齊女魯疑之起乃殺妻明不與齊也

將將

將兵

韓信謂漢高曰陛下不善將兵而善將將

柳周亞夫軍細柳文帝用軍市之租饗士

馮唐曰李牧居邊軍市之租皆

自用饗士賞賜決於外不從中覆故得盡其知能

軍行無部曲行陣

李廣擊胡軍行無部曲行

陣就善水草頓舍不擊刁斗自衛
幕府省文書然遠斥候未嘗遇害
治軍簿至明程不識與李廣

俱擊胡正部曲行伍營陣刁斗自
衛軍簿至明士多樂廣而惡不識
全師保勝趙充國行必戰備止

必堅壁全
自舉漢降羌犯塞上使丙吉問趙
山西出將

漢書贊曰秦漢以來
探簡後漢鄧禹表張宗為偏將軍
山東出相山西出將赤眉大至禹欲就堅城衆人

憚為後拒禹書諸將名於竹簡亂著笥中各令探
之宗不肯曰死生有命豈辭難就逸戰拒却赤眉
軍陣

立成後漢耿秉伯初擊匈奴封美陽侯簡易於事
休止不結營部然斥候有警急軍陣立成
拜井

水出耿恭伯宗匈奴攻疎勒城絕澗水
城中穿井不得恭向井拜泉湧出
善待卒而驕士

大夫蜀志闕侯善待卒而驕士大夫
張飛愛敬君子而不恤小人
手不能書蜀志王平字必

均長戎旅間手不能書所識不過千字愛作書論說史漢不失其指遵守法度而無戲謔舉兄子為

將晉謝玄字幼度為叔父安所器符堅南晉國謀帥推

穀之漢朝論將美祭遵王師有征利用軍帥不武何以

敦詩說禮誠趙衰之知言使仁佐賢乃求用馬援為伏

用上哀其老未許援曰臣雖老尚能被甲上馬帝試波將軍求

之援據鞍顧盼以示可用上笑曰矍鑠哉是翁也彊

禦中行穆子曰吾軍易將史記秦趙相拒廉頗堅壁不

師彊禦卒乘競勸戰趙王信間謀令趙括為將

代頗藺相如曰王以名使人若膠柱又趙良將李牧常

鼓瑟括徒讀父書不知合變後果敗居雁門備匈奴

匈奴每至輒入保不戰匈奴趙兵皆以收為怯趙王怒

使他人代將數出戰不利復請收牧如前竟大破匈奴

聽童謠命將

吳有童謠曰阿童阿童衝刀浮渡江不畏岸上虎但畏水中龍羊祜求其名應者會

王濬小字阿童才又可用祜因表為龍驤將軍備舟楫

將失一言而軍敗死

王過一言

而國

亡危命將以黼冕

晉以黼冕命王會將中軍為太傅

弓彎似月禦侮之

寄尤深

劍利如霜干城之任斯重

早陪蘭錡應知軍政之嚴

夙揔戎虜頗識

兵樞孔征伐專委將帥

白居易帝詔吐突承璀率師出討居易諫唐家制度每征伐專

委將帥責成功比年始以中人為都監韓全義討淮西賈良國監之高崇文討蜀劉正亮監之自興天下兵未

有以中人方時多虞握兵處外

郭子儀事上誠御下恕賞罰必信遭韋臣魚朝

恩程元振短毀方時多虞握兵處外然詔至即日就道無纖芥顧望故讒間不行

中人為制將

居易諫曰即承璫為制將四方聞之恐輕朝廷後以智世且傳中人為制將自陛下始陛下忍受此名哉

為本

魏元忠曰周亞夫堅壁以挫吳楚司馬懿閉營而因諸葛此皆全軍制勝不戰而卻敵是知大將臨

戎以智為本今之用人類將家子或死事孤兒臨軒授進非幹畧雖竭力盡誠不免為敗若之何用之

鉞

渾瑊為奉天行營副元帥帝疑者不使使者不疑臨軒授鉞用漢拜韓信故事疑者不使使者不疑

云凡任將帥疑者不使使者不疑勞神於拔選端拱於委任

蕭復嘗言

艱難以來始用宦者監軍

權望大重此曹止可委官掖事兵要政機勿使參領帝不聽

王峻贊

唐所以能威振夷荒斥大封域

亦有虎臣為之牙距也至師行數千萬里窮討殊闕獵取其國如鹿豕然可謂選值其才歟

陸贄曰

今將之號令不能行之軍國之典刑不能施之將上下相養以苟歲時欲褒一有功慮無功者怨嫌疑而不賞

欲責一有罪畏同惡者疎隱忍而不誅故忘先求易制

者

今陛下命帥先求易制者多其部使力分輕其任二

帥連營

章貫之初討蔡以宣武韓弘為都統又詔河陽

方力今若置都統又令二帥連營則斬長蛇殪封豕希

各持重養威未可歲月下也亦不從

烈臨汝州詔拜哥舒曜東都汝州行營節度使帝召見

問曰卿治兵孰與父賢對曰先臣安敢比但斬長蛇殪

封豕然後待罪私室臣之願也帝曰爾父昔御勤政樓

在開元時朝廷無西憂今朕得卿亦不東慮

引榮王受命

安祿山反榮王為元帥東討

帝御勤政樓引榮王受命

校為將

魏元忠上

身不臨邊

陸贄帥臣身不臨邊而以

悉選以自奉委疲羸者以守要衝寇至而不支則却執
芟蹂恣所欲得比都府聞之虜已旋返治兵若此斯可
謂措置風前畧橫陣我愛李侍中操操七尺長白羽八
乖方矣

鬚分兩傍淮西萬虎士怒萬夫之特勉作萬夫之
目不敢當杜牧郡齋獨酌

長榆塞護長榆兵分雷泉之靈太白之精雷泉之靈膺
細柳梁柴幹制

郭元風雲動色龜兕作威齋壇命信靈旗指缺卻穀之
振碑

詩書文粹臣繆寄台司章當統帥乏吉甫之文武缺卻
穀之詩書此皆諸將協心羣帥宣力破朱泚露布

于公假陸遜之鉞拜韓信之壇段文昌莫重謀帥贊皇
異准西碑

集賜劉沔詔意自古出師莫重謀帥
故李廣威動殊鄰吳漢隱如敵國

偏將二

白偏將軍處左 職佐中軍 裨佐 裨將 記曰軍

尚左

見大將門注

卒尚右

右陰也陰主殺卒之行位以右為上示有死志

別屯專殺

後漢竇固出擊匈奴騎都尉秦彭為副彭在別屯輒以法斬人固奏曰秦彭專擅請誅之朝議皆然郭躬仲孫獨曰於法彭得帝曰當一統於督彭無斧鉞何以得躬曰在部曲則不得彭今專軍別將且漢制榮戟則為斧鉞帝乃不受節度晉命王濬伐吳受王渾節度濬乘勝從之不受節度順流遂不詣渾渾表濬違詔不受節度誣罪之有司遂按請不置偏將馮奉世子明討羌請濬檻車徵帝不許益兵上為發六萬人太常任千秋將以助焉奉世以得其眾不須復孔偏將煩將上讓之曰大將軍出必有偏將軍何煩焉

尉遲恭劉武周亂以為偏將范陽裨將劉忤少為裨將與宋金剛南侵得晉澮等州

羅弘信為裨偏裨李全畧事王武俊為偏裨解所佩劍贈之李光顏將主馬牧

節度使馬燧謂曰若有奇相積功勞至節度使杜希全終必光大解所佩劍贈之

隸郭子儀積功勞位不過裨將李晟世以武力仕待之至朔方節度使

加禮韓滉初判度支李晟以裨將白軍事滉待之加禮使其子拜之厚遺器幣鞍馬後晟終立大功官

秩猶卑贊皇一品集賜劉沔詔意聞王逢頗有武用又緣偏裨日近官秩猶卑指揮諸軍即未為稱

重戎事而肅王命一品集李丕克攻討副使晉謀元帥則有佐軍漢制出師皆立副貳所以

重戎事而得具嚴之稱同上淬其智刃研未兆之肅王命也機森其禮于得具嚴之稱李勣

之敗平壤參以道宗李靖之襲陰山副之公謹

自古出師皆有

副貳臨難則權以相濟料敵則智以相資故韓信伐趙張耳為貳吳漢征蜀劉向副軍國朝以來長用此制李勣之敗平壤參以道宗李靖之襲陰山副之公謹厚以儻能坐覆妖巢亦自歸功元帥賜劉彥佐詔意

幣招之

王虔休刺史李深署為裨將澤潞李抱真聞其名厚以幣招之

身先士卒

五代

少事王鎔以功遷裨校隸符習軍鎔為張文禮所弑震從習討文禮而家在趙文禮執震母妻及十餘人以招震震不顧文禮乃皆斷其手鼻震一慟而止憤激自厲身先士卒晉軍攻破鎮州以功拜刺史

王周

唐

莊宗明宗為裨將以力戰有功拜刺史

威名將

三

老將附

白得臣猶在憂未艾也

晉敗楚于城濮晉侯猶有憂色曰得臣猶在憂未艾也

子

王將則文公側席而坐

漢書

管夷吾所居國重

史記鮑子云

蘭

相如曰彊秦不敢加兵以吾兩人也

兩人廉頗藺相如也

若一敵

國

漢書曰周亞夫為大將得劇孟喜曰若一敵國也

鮮卑不敢南近塞

後漢鄧訓遷烏

桓校尉

萬人敵

蜀志張飛雄壯威猛亞關侯魏謀臣程昱等咸稱飛侯萬人敵

周訪有平

河洛志善撫納士皆為死王敦有不臣之心終訪之世

不敢為非

晉

何武上書

忠臣社稷之衛魯以季友治亂楚以子玉輕重魏以無忌折衝

項以范增存亡故楚國帶甲百萬於國不以為難子玉將則晉文公側席而坐及死君臣相賀百萬不如一賢

也頗牧之名

李牧

射偶人

郅都為雁門守匈奴不近雁門匈奴為偶人象都令騎射

莫能中之見

克國擊羌

羌人相謂曰汝無反天子遣孔

來嚼鐵

來填賊懼目

羌畏不敢惕息

辛雲京回紇入朝所在暴鈔至太原

雲京以戎狄待之

有大畧

李光弼嚴毅沈果有大畧幼不嬉弄善騎射

四鄰

畏威

田洪正數上表固請留闕下帝勞曰昨韓弘以疾辭不就軍朕既從之今卿復爾我不應違但魏人

樂卿之政四鄰畏卿之威為朕長城又安用辭

察軍中素恣橫者三百人斬之

汴自劉士寧以來軍益驕韓弘察軍中素恣橫者三百人斬之流血丹道弘言笑自如自是訖弘去無一人敢

肆突厥下馬羅拜

薛仁貴檢校代州都督率兵擊突厥元珍於雲州突厥問曰唐將為誰曰

薛仁貴突厥曰吾聞薛將軍流象州死矣安得復生
仁貴脫兜鍪見之突厥相視失色下馬羅拜且遁去

威震北方

馬燧

憚威拜城上

賊將徐庭光守長春宮城燧度長春不下乃挺身至城下

見庭光庭光憚威拜城上

王式

初交趾數有變懼式威不自安譁曰黃頭軍將渡海襲我矣相率抗黃頭

軍式翌日盡捕斬之

羌道其名以怖啼兒

郝玘為原州刺史自是羌不敢過臨涇玘在邊

積三十年每討賊不持糗糧取之於敵獲羌必剗剔而歸其屍羌大畏道其名以怖啼兒

軍中指顧

諸將不敢仰視

李光弼治師訓整天下服其威名軍中指顧諸將不敢仰視

見者重

足股栗

竇軌從討王世充明年還蜀既貴益嚴酷然能自勤苦每出師臨敵身未嘗解甲其下有不用

命即誅至小過亦鞭笞流血人見者皆重足股栗由是蜀盜悉平

回鶻不敢仰視

王鐸為河

中節度使會回鶻入朝鍰欲示威武乃悉軍迎廷列五十里旗幟鮮明戈鎧犀密回鶻恐不敢仰視鍰偃然受

其禮帝宿將高固拜邠寧節度使固本威令肅然李景畧拜

豐州刺史天德軍西受降城都防禦使威震關中郭子儀六

軍將張知節迎子儀洛南一軍皆震朔方節度留後大

將孫守亮擁重兵驕蹇不受制嗣恭戎夷畏憚郭知運

因稱疾守亮至即殺之一軍皆震功名畧等時號王郭當世號為名將王忠蕃戎不敢入

寇劉潼拜秦州刺史蕃望風送款李聽帝討李師道出

綿弱鄆人素易之聽自整勒士唐明宗李嗣源號李橫

代唐臨敵御衆肅然有將帥之威

左右馳驟疾若風雨晉人望其行陣齊整

相謂曰謝彥章必在此也其名重敵中如此五代謝彥章

真神將

太祖以寇彥卿為都排陣使使乘烏

馳突陣前因目之曰真神將也

氣貌偉特時謂熊虎相

感慕節義有古人風其御下肅

壹吏人畏愛王峻

軍中為之股栗

史洪肇為將嚴毅寡言麾下嘗少忤意立以殺之軍中為

之股栗

精誠發而石開忠志作而虹貫

授河清朝左衛將軍制

漢用

駱甲則灌嬰傳于騎將魏得關侯則張遼挾以前驅故

挫強楚之鋒鉉取顏良于麾蓋同上

名蓋一時

唐史臣稱馬燧

喜得虓將

帝謂薛仁貴曰

朕舊將皆老欲擢驍勇付闔外事莫如卿者朕不喜得遼東喜得虓將

儒學將四

白晉謀元帥趙衰曰卻縠可也說禮樂而敦詩書

傳

帷

中講論

後漢張奐為匈奴中郎將烏桓叛燒軍門與坐帷中與弟子講論若無事衆稍安

雅歌

投壺

祭遵為將軍奏置五經博士大夫軍中與諸生雅歌投壺選將用儒士也愛樂儒士

魏志

張郃武將而愛樂儒士嘗薦同郡王湛言經明也

手不釋卷

吳志魯肅為將手不釋卷

勸將

學問

孫權謂呂蒙將欽曰宜學問自開益蒙曰軍中日苦多務不及讀書權曰孤豈欲卿治經為博士耶

但令涉獵見往事爾蒙始就學雖舊儒不及

漢書儒林傳序曰明帝正坐自

講諸儒執經問難於前又別立校舍自期門羽林之士

悉令通孝經章句

論說史漢

見大將門

不跨馬

杜預字元凱身不跨

馬射不穿札

有功

後漢盧植子幹初在東觀校書續漢記後拜北平中郎將持節護烏桓連

戰皆捷破

隱几

孔融為北海相袁譚攻之流矢雨集融隱几讀書言笑自若城陷奔東山妻子

為譚所虜

合之以文

以武

內脩文德良資羽翼之才

外拓遐方必藉

爪牙之器

孔畧知書

來填畧知書尚名節

多所該究

封常清外祖教之讀書多所該究

居處服玩如儒先生

韓充雖將家性節儉歷三鎮居處服玩如儒先生

起樓聚

書

田洪正性忠厚好功名起樓聚書萬餘卷通春秋左氏與賓屬講論終日客為著沂公史例行於世

知兵

唐璿以儒者號知兵自礪石踰四鎮其間綿地幾萬里山川夷阻障塞之要皆能言之故行師料敵

未嘗敗

脩史即軍中論譔

張說授并州長史兼天平軍大
使脩國史勅賁藁即軍中論譔

率兵南巡宣布天子恩意

李靖授嶺南撫慰大使以嶺
南陋遠久不見德非震威武

示禮義則無以變風即率兵南巡所過問疾苦延見長老宣布天子恩意遠近懽服自稱儒者王

嘗讀春秋自稱儒者士頗笑之

通春秋漢書

渾瑊通春秋漢書嘗慕司
馬遷自叙著行紀一篇

頗牧在禁署

畢誠召入翰林為學士党項擾河西宣宗
嘗召訪邊事誠援質古今條破羌狀甚悉

帝悅曰吾將擇能帥者孰謂頗牧在吾禁署中卿為朕
行乎誠唯唯即拜刑部侍郎出為邠寧節度河西供軍

安撫

儒者之勇

鄭畋遷西面行營都統巢大懼不敢西
謀當此時微畋天子幾殆帝聞捷曰朕

知畋不盡儒者之勇乃爾提鼓揮桴臨難決疑

此將事也一劍之任
非將事也謹按諸葛

亮臨戎不親行陣頓蜀兵於渭南宣王唐休璟授易於持銳卒不敢當此豈弓矢之用也薛登

馬嘉運傳禮於賈公彥

本傳

謝艾書生也破麻秋勁銳之

卒

文粹陸長源書

儒者

契丹攻陷平州得張希崇知其儒者也

婁師德

第進士調江都尉募

猛士討吐蕃乃自奮戴紅抹額來應詔本傳

烏震

少好學通左氏春秋喜作詩善書五代

文吏

為將

李林甫疾儒臣以方畧即邊勞且大任欲杜其本以久已權即說帝曰以陛下雄才國家富彊而夷狄

未滅者繇文吏為將憚矢石不身先不如用蕃將彼生而雄養馬上長行陣天性然也若陛下感而用之使必

死夷狄不足圖也帝然之

李光弼贊

光弼好讀班固漢書異夫庸人武夫者

涉書史

劉濞

涉書史有材武

不樂軍旅

田廷玠尚儒學不樂軍旅

退讓如諸生

史孝章父憲誠以戰

力奮孝章獨退讓如諸生稱道皆詩書

通書習戎事

張仲武范陽人通左氏春秋仲武遣其屬

吳仲舒入朝請以兵擊回鶻德裕因問北方事仲舒曰仲武舊將張光朝子年五十餘通書習戎事

居軍

中嘗儒服

五代謝彥章為將好禮儒士雖居軍中嘗儒服

以禮法自矜

李晟子憲與慙

長喜儒以禮法自矜

通左氏春秋

張希崇少好學通左氏春秋劉守光不喜儒士希崇因事軍中

為偏將五代史

身見儒士

曹華始從宣武軍為交海節度使充自李正己盜齊魯俗益汙驚華下令

曰鄒魯禮義鄉不可忘本乃身見儒士春秋祀孔子祠立學官講誦斥家貲佐贍給人乃知教成就諸生仕諸

朝華出戎伍而動必由禮

用春秋戰法

房瑄平賊

乘高伐鼓賊不測衆寡

鄭畋為西面行營都統賊將王璠率衆三萬來攻畋使弘夫設伏以待殺賊二萬級積尸數十里璠遁去

宗族從軍五

白子弟從軍

蕭何遣宗族子弟從軍侍漢王

後漢耿純字伯山率宗族

賓客三千人從世祖

恐賓客等有異心乃燒其廬舍以絕反顧之望

舉宗陳力

魏志韋成宗族三千人家居乘氏請從魏郡太祖曰卿欲慕耿純耶謝曰臣功微寵過舉宗陳力今征伐未息宜實郊隧非敢望純云云臧霸率子弟請收族屬詣鄴孔史敬奉甥

姪部曲二百人每出輒分隊為四五

隨水草數日不相知及相遇已皆有

獲

逆羌冥冥隨煙燼卿家兄弟功名震

杜甫惜別行

深誠補

王室戮力自元昆

紂然喪亂際見此忠孝門蜀中寇亦甚栢氏功彌存深誠補王室戮力自

元昆杜覽栢中允并
子姪數人除官詩

同心注師律灑血在戎軒

子弟光
卒伍芝

蘭疊璵璫同心注師
律灑血在戎軒同上

年十一善騎射

渾瑊父釋之有材
武從朔方軍瑊年

十一善騎射隨釋之防秋朔方節度使張
齊邱戲曰與乳媪俱來邪是歲立跳盪功

請以子率奴

馬從軍

兵志郭子儀之婿端王傳吳仲孺殖貲累巨萬
聞國家有急不自安請以子率奴馬從軍德宗

喜甚為官
其子五品

家出子弟馬奴裝鎧助征

白志貞乃請節度
都團練觀察使與

世嘗任者家皆出子弟奴馬裝鎧助征授官如
仲孺子於是豪富者緣為幸而貧者苦之同上

軍旅六

白軍旅鈇鉞者先王所以飾怒也

禮

師出以律否臧凶

易師貞丈人吉无咎易軍旅之事未之學也孔子對建

侯行師易同邦國周禮宗伯以制軍詰禁以糾邦國周禮

大司馬挈壺氏掌挈壺以令軍井壺以盛飲軍事懸壺以

序聚橐懸壺為漏以次更序聚橐聽師田以簡誓周禮

也簡閱也挈轡以令舍轡所以駕凡軍旅夜鼓鼙鼙夜戒守

鼓四通為鼙牙璋中璋以起軍旅以治兵守注二璋皆有鉏

若今之銅虎符挈畚以令糧畚盛記曰軍旅思險隱情以虞思

己之所能以度彼能否也介冑有不可犯之色孝悌脩軍旅衆以

義死之而不可犯也

師在制命

命由己制也傳

勤王之師

成師以出

五材廢一不可

誰能去兵

兵所以威

不軌而昭文德聖人以興

湯武

亂人以廢

桀紂

彊禦

中行穆子曰吾

軍師彊禦卒乘競勸

允當

軍志曰允當則歸也

拜賜之後

秦孟明也

中權後勁

勁兵

殿而中軍制謀

兵事以嚴終不土其地不分其民

穀梁云

南北軍

材官七校

漢刑法志高祖踵秦而置材官於郡國京師有南北軍軍屯武帝內脩七校不常置也

勞逸相待

蜀志陸瑁曰兵家之術以力相疲勞逸相待愛力惜費以待卻敵之用

六十不

以戎服

禮

鋪敦淮夷仍執醜虜

注敦當作屯屯其兵於淮水大防之上

詩

常武名穆公美宣王有常德以立武事匪紹匪遊徐方

繹騷

箋云軍行三十里非懈緩也非遨遊也

孔娘子軍

平陽昭公主下嫁柴紹帝渡河紹以

數百騎並南山來迎主引精兵萬人與秦王會渭北紹及主對置幕府分定京師號娘子軍

陳子昂

上言

言軍旅之弊

斥虛名

韓充轉大將軍斥軍士虛名不如令者七百人

兵至五萬

王鏐為河中節度使徙河東河東自范希朝討鎮無功兵纔三萬騎六百府庫殘耗鏐能補完嗇費未幾兵至五萬騎五十

請罷二十萬還農

張說故時邊鎮兵贏六十萬說以時平無所事

請罷二十萬還農天下以為疑說曰邊兵雖廣諸將自衛營私爾所以制敵不在衆也以陛下之明四夷畏威不慮減兵而招寇臣請以

禁兵寡少

段秀實嘗以禁兵寡弱不足備非常

言於帝曰古者天子曰萬乘諸侯曰千乘大夫曰百乘
蓋以大制小以十制一今外有不廷之虜內有梗命之
臣而禁兵寡少卒有患難何以待之且猛虎所以百獸
畏者為爪牙也若去之則犬彘馬牛皆能為敵帝不用
及涇卒亂召神策六軍願充一卒効力王事李邕貶遵
無一人至者世多其謀化尉妻溫

復為邕請戍邊自贖曰妾願使邕得充一卒効力
王事膏塗朔邊骨糞沙壤成邕夙心表入不省魏府

牙軍

羅紹威嗣父節度驕悍難制時語鴉兒黃巢陷京
曰長安天子魏府牙軍言勢彊也師陳敬瑄

遣黃頭軍部將李鋌鞏成以兵萬五千屯興平數敗
巢軍賊號蜀兵為鴉兒每戰輒戒曰毋與鴉兒鬪衛

兵皆長安高貲

然衛兵皆長安高貲世籍兩軍得廩賜
黃巢傳帝錢田令孜章信門賁遺豐優

侈服怒馬以說權豪初不知戰聞科選皆哀哭千家陰
出資顧販區病坊以備行陣不能持兵觀者寒毛以慄

林會山立星羅翼舒

杜牧尚漢美制

蛇矛犀渠之士

獨孤及祭轟文虎牙

鷹揚之臣蛇矛犀渠之士

一旅之師

元稹代論淮西書以一旅之師抗天下無窮之衆雖安婦駭孩

猶知笑之而況於義夫壯士哉

王卒嶷嶷熊羆是式

衛勇韜力自思奮強柳宗元詩精

騎練卒

陸贄奏議代朔郿靈之騎士自昔之精騎也上黨盟津之步卒當今之練卒也

唐兵三

變

其始盛時有府兵府兵後廢而為彊騎彊騎又廢而方鎮之兵盛矣及其末也強臣悍將兵布天下而天

子亦自置兵於京師曰禁軍其後天子弱方鎮強而唐遂以亡滅者措置之勢使然也唐兵志

府兵之

制起自西魏後周而備於隋唐興因之

隋制十二衛曰翊衛曰驍騎衛

曰武衛曰屯衛曰禦衛曰侯衛為左右皆有將軍以分統諸府之兵同上

又有驃騎車騎二

府

皆有將軍後更驃騎曰鷹揚郎將車騎曰副郎將別置折衝果毅同上

太宗貞觀十年

諸府摠曰折衝府

凡天下十道置府六百三十四皆有名號而關內二百六十有一皆以隸

諸衛

凡府三等

兵千二百人為上千人為中八百人為下同上

府置折衝都尉

左右果毅都尉各一人長史兵曹別將各一人校尉六人士以三百人為團團有校尉五十人為隊隊有正十人為火火有長同上凡民年二十為兵六十免

同烈烈王者師熊

螭以為徒

柳宗元鼓吹曲

出征七

白夫子有三軍之事

兩軍之士皆未慙

慙缺也

以征不

義詰誅暴慢深入長驅掃攬搶戮鯨奉辭伐罪

受命忘家

司馬穰苴曰受命之日則忘其家臨敵則忘其身

秉王怒行天誅

啓滅

有扈而夏功昭

成克商奄而周德著

成王四征不庭

震揚黃鉞

之威

以遏亂畧

王于興師

觀兵

示威

專征伐

諸侯賜彤弓然

後專征伐

君命大事

大事謂軍事

陳師鞠旅以王命討不庭

正之體也

國之大事在祀與戎

奄征于兵者

以威不軌

殷湯始伐猶

有慙德

有征無戰

王者之師

歌采薇以遣之

周文王遣將帥之臣

周

公三年東征

宣王六月北伐

薄伐于征

凡軍行被社

禱社也

遠

征親討耀武 多壘 七伐一戎示衆 肅將天威 恭行

天罰 徂征 攻昧 我武惟揚 取彼凶殘 方叔

南征荆蠻詩人歌之列于雅 克國西伐先零詞臣美之著於贊 即戎

大司馬以九伐之法征邦國周禮 鐘鼓之伐有鐘鼓曰伐傳例 揚

軍旅周禮 自天子出天下有道則禮樂征伐自天子出 師必有名隨善惡為名也

翦伐 即戎而行造以采薇之咏 擇利而動收其破竹之功 武人東征

不遑朝矣 戎車嘽嘽如霆如雷 奮伐荆楚 赫赫南仲薄伐

西賊賢害民則伐之負固不服則侵之侵謂兵至境而已 遣將

授節

晉禮志曰漢魏故事遣將出征授節鉞於朝後荀顗等定新禮遣將御臨軒尚書授節鉞依古兵法

跪而推轂之義也

受律以出濯征仇方

濯大也

建侯行師

易

伐國

不問仁人

魯君問柳下惠吾欲伐齊對曰不可歸而有憂色曰吾聞伐國不問仁人此言何為至於

我討其不庭

伐以昏德

叛而不討何以示威

服而不柔

武先

禁暴

師克在和

因山川以設險

整干戈而作威

九黎之亂德

黃帝興師

三

苗之不舉

虞舜稱兵

疆場無主

則啟戎心

孔平淮西

裴度平淮西及行上御通

化門臨遣賜通天御帶發神策騎三百為衛

命將興師以討四方

陸贄上書云

天

子無親將

吐蕃盜邊帝怒欲自將討平之蘇頌上言古天子無親將惟黃帝五十二戰當未平之時

自阪泉功成則脩身閑居無為無事陛下撥定禍亂方
當深視高居制禮作樂禪梁父登崆峒何至厭天居社

金革為一每戰必為先鋒李嗣業每戰必為先鋒所嚮逐北跳盪先鋒

從平石國及突馳施裂帛繫書喻以禍福椎牛饗士養

以威聲謝赴行營表指麾而驅兕作威感激而風雲動

深入合攻七擒連發而星馳乘斗杓而誓旅出星門而

杖鉞楊炯少姨廟碑涼風至司馬於是乎順天行討正

在今日賜王元逵詔清商已至聲鼓聲雄白露將凝戈

天行討正鉞色耀飛隼應節而逾鴈代馬嘶風而自豪順

在今日刻期深入屢挫狂鋒批亢擣虛遵欸游刃永

勲勸豈忘予懷一品
集賜石雄及三軍

誓不與賊偕存

裴度

困獸當猛虎窮

魚餌犇鯨

李白古風

凡大將出征皆告廟授斧鉞

辭太公廟辭訖不返

宿於家

六典

發軍八

白周禮八成二曰聽師田以簡誓

計合士卒簡閱兵器為要薄也

牙璋

中璋以起軍旅以治兵守

見上軍旅門

有發則命大司徒教

士以車甲

發卒兵也王制

傳曰司馬請瑞焉

瑞符節以發兵

高祖曰吾

以羽檄徵天下兵未有至者

檄木長三尺用徵召急則插以鳥羽示急也

以

節發兵

漢武曰吾新即位不欲出虎符恐驚吾郡國迺遣嚴助以節發會稽兵會稽守欲拒法不發注

言欲以法拒之為無符驗助乃頭鬢白後漢光武每發一兵頭鬢皆白

吳漢行師

朝受詔夕引道老弱漢王在滎陽蕭何發關中老弱未傳者悉赴軍注云古者二十

而傳傳音附

發針工

史尉佗攻百越上書求女無夫家者三萬人為卒補衣秦皇帝可其萬五千人

故百姓離心欲亂者十七八也

請監軍

後漢馮緄鴻臚卿討武陵蠻性烈直不行賄賂懼為所中乃上

疏請中常侍一人監財費朱穆奏銀以財自嫌失大臣節有詔勿劾

擅飾城門官舍稽乏

軍興檻車徵以侯贖

晉石鑒奏杜元凱為校尉云云

漢黃霸

為京兆尹發騎士詣

北軍以馬不適士劾乏軍興連貶秩注馬少士多不相補滿也適音的

具其卒乘

繕以孔甲兵

陸贄曰

今財匱于中人勞未瘳而欲發師徒以犯獵寇境復其侵疆攻其堅城前有勝負未必之虞後

有餽運不繼之患萬一撓敗適以啓戎心而挫國威也

兵甲歲興

陳子昂八科曰今事之最大者

患兵甲歲興賦役不省興師十萬則百萬之家不得安業

魏徵曰

比無事興兵問罪遠裔

發自

光福里第

王式寧國劇賊仇甫亂明越觀察使鄭祗德不能討宰相選式往代詔可因至京師懿宗

問方畧對曰第假臣兵寇不足平也左右官要皆曰兵衆則餽多當惜天下費式奏盜若猖狂天誅不亟決東南征賦闕矣寧得以億萬計之乎兵多則功速費寡二者孰利帝顧左右曰宜與兵於是詔益許滑淮南兵式發自光福里第麾幟皆東靡獵獵有聲喜曰是謂得天時矣

承命於牙旗之下分麾

於轅門之外

文粹于公異破朱泚露布五月二十八日寅時華州鎮國軍節度使駱元光等承命

於牙旗之下分麾於轅門之外將士等超乘賈勇免胄
啓行夾川陸而左旋右抽抵邱陵而浸淫布護聲塞宇
宙氣雄鉦鼓陳兵於光泰門外盡銳於神廡倉東繚垣
摧以成塵滋水洄而為地左廣未離於舊壘前偏已交
於賊鋒若降於
天如出於地

祭師九

白周禮太師設軍社類乎上帝太祝宜乎社造乎禰將師

行也記曰天子將出類乎上帝帝五德之帝類受命於祖

禡於所征之地告祖也受成於學定兵謀也出征執有罪反釋奠

於學以訊馘告 桓桓講武是類是禡類禡皆師祭也祭蚩尤

漢高為沛公祠黃帝祭

孔葛水沈祭

王方翼次葛水暴漲師不可渡沈祭

以既禡既類

于社是宜柳宗元平淮夷雅

假神祇之幽贊

文粹禡牙饗社假神

祇之幽贊破朱泚露布于公異

五將護野萬靈並轂

獨孤及祭肅文惟神降衆尚弼予志

敢告無靡旗無絳騁無汰輶無僨車命五將護野萬靈並轂令天地氣稔望風掃除魑魅魍魎罔不率俾莫我

敢過為神祇羞

斬馬祭旄肅

韓愈聯句

澧有大特化為巨梓秦人憑

神乃建茸頭

是為兵主用以行師柳宗元祭肅文

禡肅黃堂前

康承訓崔彥曾乃禡

肅黃堂前選兵三千授都虞候元密屯任山須龐勛至却取之本傳

接戰十

白張吾三軍皆陣曰戰連百萬之衆戰必勝攻必取

韓

忘身

司馬穰苴曰援桴鼓之急則忘其身

鼓譟而進一戰而霸左旋

右

唯敵是求

左輪朱殷

兵深也

鬪志

鬪心

先人有奪人之

軍之

善謀

夫戰勇氣也一鼓作氣再而衰三而竭

彼竭

我盈

神怒人怨

見可而進

擐甲執兵

固即死也

躬擐甲胄

親授矢石

脩陣固列日尋干戈

敦陣整旅

為魚麗之陣

被

堅執銳

八陣

勅敵

銳師

率是熊羆整斯鵠鵠

鵠鵠陣名也傳

曰鄭偏願為鵠其御願為鵠

我伐用張

稱爾戈

比爾干立爾矛

六伐七伐

伐擊刺也六步七步書曰今日之事不愆于六步七步乃止齊焉其旅若林紂合

圍旂動而鼓旂大將之旗鼓僂傳曰鼓僂可也言敵人在僂處險處未成列可鼓而

擊之也元戎十乘以先啓行嘗寇也嘗試我戰則克孔子

堂堂之陣趙趙之夫率鳥合之師列魚麗之陣彼見吾貌必有懼

心貌軍容也玉石俱焚靡旌摩執燧象以奔吳師楚昭王敗伯舉

也驅畫牛以觸燕衆田單守即墨轍亂旗靡傳曹劌曰吾視其轍亂望其旗

靡故逐之也曳柴偽遁武不違敵左實右偽右以木物為人形乘

勝逐北斬將奪旗方蒙矢石漢王矯翦控弦刑法志曰齊愍以矯

翦控弦得一
首以賜金
君未知戰
宋襄公不鼓不成列
獲則取之
明恥

教戰求殺敵也
交綏而退
陷陣却敵
前蒙矢石
刻

日戰
羊祜事見示信門
夜戰其聲相聞
足以相救
晝戰其目相視足以相識

翦滅
兩軍之士皆未慙
慙缺也傳
決勝運籌
中權後勁
孔挾矛

駢馬
王難得為河源軍使吐蕃贊子郎支都者恃趨敏乘名馬寶鈿鞍畧陣挑戰甚閑暇無敢校者難得

怒挾矛
駢馬馳支都不暇闢直斬其首明皇壯其果召見令殿前乘馬挾矛作刺賊狀帝大悅賜錦袍金帶

陸贄曰
以水草為居討獵為生便於馳突不恥敗亡此戎狄所長中國之短也而欲益兵蒐乘爭驅角

力交鋒原野之上
決命尋常之間
以車騎挑戰
程千里傳賊將

蔡希德圍上黨較騎挑戰千里恃勇開將數騎突入賊

中李光顏元和九年討蔡明年大破賊時曲初賊晨壓

反往一再眾識光顏矢集其身如蝟手攬馬鞅諫馬燧

贊曰燧每戰親令於眾無不感慨用命郭子儀安祿山

常山會李光弼攻賊常山拔之于儀引軍下井陘與光

弼合破賊祿山益出精兵佐思明子儀曰彼恃加兵必

決戮一步將以徇士殊死鬪遂破之掃境以來利速戰

敗行密欲守銅官李神福曰儒掃境以來利速戰宜堅

壁老其師則我無敵矣又出輕騎絕賊糧道使前不得

戰退無仰儲不亡何待於是行密以神福為宣地都遊

使勒大將教戰各出其意

張巡用兵未嘗依古法勒大將教戰各出其意或問之答

曰古者人情敦樸故軍有左右前後大將居中三軍望之以齊進退今胡人務馳突雲合鳥散變態百出故吾

止使兵識將意將識士情上下相習人自為戰矣

近戰則守家遠戰則利貨鄭

中宗時歷右補闕默啜入寇敗沙吒忠義詔百官陳破賊勝策備言宜因古法募人徙邊免行役次廬伍明教令賞虜獲近戰則守家遠戰則利貨購辦勇結諸蕃以圖攻取

叢矛注矢

安祿山率河東兵討契丹

次天門嶺會雨甚弓弛矢脫不可用祿山督戰急何思德白士方疲宜少息使使者陳利以脅賊賊必降祿山

怒欲斬以令軍乃請戰思德貌類祿山及戰賊叢矛注矢邀取之傳言祿山獲矣奚聞以叛夾攻祿山

短

兵王世充與李密戰世充多短兵盾積蹙之

冒矢石死戰

賈隱林屬朱泚難率眾扈行在賊圍

擊隱林與侯仲莊冒矢石死戰已而解從臣搢慶

手挺麇擊

李嗣業從平石國馳守白石路既隘

步騎魚貫而前會拔汗那還兵輜餉塞道不可騁嗣業懼追及手挺麇擊人馬斃仆者數十百虜駭走

兩

兵相交退者先敗

杜重威安重榮反重威逆戰于宗城重榮為偃月陣重威擊之不動重威

欲少却以伺之偏將王重脣曰兩兵相交退者先敗乃分為三重威先以左右隊擊其兩翼戰酣重脣以精兵擊其中軍重榮將趙彥之來奔重榮遂大敗走還鎮州重威攻破之五代史

奇兵征衝驍騎

橫挑

杜牧田克制

鼉鼓騰聲而隱轡

于公異破朱泚露布霜刃交光而震耀鼉鼓騰

聲而隱轡烏鳥將墜尚顧危巢

同上烏鳥將墜尚顧危巢妖狐就擒猶守舊穴謹譟之聲

山傾而河泄鼓聲之氣霆闕而雷馳屏翳發向敵之風回祿扇燎原之焰

思齒劍者投袂而

興爭淬刃者不期而會同上拔箭斷膚殊死前鬪王難得收京師方戰麾下士失馬難

得馳救矢著眉拔膚郵目乃拔箭一戰而蜂蟄盡殲不

時而梟獍就戮元稹授李愿節度使制提持戈戟淬礪卒徒云云指麾而驅兇

作威感激而風雲動色七擒連發而星馳兩翼旁張而

雲合于公異露布

軍政令十一

白軍旅之事 軍政不戒而備孫叔敖介冑則有不可犯

之色貌與服稱介者不拜 武車不式 戎容暨暨音忌果毅貌

言容諮諮

音額教令顏色

山立不動

玉色不變

誓旅三令

五申

孫武

下令於軍中

整必勝之衆

實在中權

勵賈勇之夫

必曰

明恥教戰求殺敵也

明戮其不果者

師直為壯曲為老豈

在久乎

傳

軍之善政

古之善教

師克在和不在衆

闕廉曰

禮樂

慈愛戰所蓄也

士為

武之善經整軍而經武

師出以

律否臧凶

易

師之耳目在吾旗鼓

言衆觀大將旗鼓以進退

戰所由

克有死無犯

魏絳曰軍事有死而無犯為敬

有嚴

有翼

政令不一

莫

肯用命

先穀

威命

御一心之衆

建百勝之功

軍容

戎政

威克厥

愛允濟愛克厥威允罔功

書盾

聞將軍令不聞天子詔

亞夫軍細柳軍吏曰

立武

然則師非訓習令貴申嚴

率素厲

以行

必無通也

驅白徒而戰

是謂棄之

天子按轡徐行

文帝勞軍細柳

經

武

守文

軍禁

周禮

銜枚

周禮軍旅令銜枚禁無驚

行間將整其什伍

令下不可

以二

既崇四七之名

安可三之令

申嚴號令

月令

凡執禁以齊

衆

不赦過

禮

振鐸警衆

號令也

戎昭武列

既申詬詬

之言

必整堂堂之陣

整烏合之衆

既在一夫

勵鷹揚之師

必資三令

管子

謂齊桓公曰

君若正卒伍脩甲兵則大國亦然而小國設備難以得志可以作內政以寓軍令故

正卒伍整於國治軍旅整於郊內教既成勿使遽徙什伍之人祭祀同福死喪同恤世同居晝同游故夜戰其聲相聞足以相救晝戰其目相見足以相識居同樂得同利死同哀有士三萬人方行天下誅無道莫能禦也

穰苴斬莊賈

田穰苴將兵請莊賈為監軍與賈日午為期賈恃貴日暮方來苴問法於軍正軍正

曰後期當斬遂斬賈

敗麥割髮

魏志太祖出軍令無敗麥犯者死騎皆下馬持麥相待太祖馬騰入

麥中勅主爵議罰對曰春秋罰不加尊太祖曰作法自犯何以率下然孤為軍率不可殺請自刑拔劍割髮置

地**士取民笠斬之**

吳志呂蒙入南郡令軍不得干歷人家蒙麾下士取民之笠以覆官鎧蒙

曰不可以鄉里故廢法垂涕斬之士與蒙俱汝南人也

髡其職吏

吳志射聲校尉孫松於公子中

最親戲下兵不整陸遜對之髡其職吏

殺妻

晉永嘉亂郭默帥眾自為塢撫循將士甚得歡心默婦兄

陸嘉取官米十石餉妹叱斬子

魏志鄧艾遣子忠與諸葛瞻戰不利還白賊未

可擊艾怒曰存亡之分在此一舉

教婦人

闔廬謂孫武曰子兵法十

叱忠將斬之忠馳還更戰大破之

三篇吾盡見矣可教婦人乎曰可於是出宮女三千孫

子分為二隊寵姬二人為隊長令鼓之皆左婦人大笑

孫子又三令五申之又鼓之皆右復笑孫子斬二隊長

吳王使救之不可用其次為隊長於是左右前後皆中

規矩報吳王曰

赴水火可矣

秣馬蓐食

訓卒

孔宣朝廷厚意

裴度為淮西宣

慰招討處置使屯郾城勞諸軍宣朝廷厚意士奮于勇

下令士皆雪泣

李晟圖復京師乃陳

兵下令曰國家多難乘輿播遷見危死節自吾之分公

等此時不誅元兇取富貴非豪英也士皆雪泣曰惟公

命號令嚴壹

段秀實知奉天行營事號令嚴壹軍中畏戢

夜登城守者不許

呂元膺為中丞拜鄂兵觀察使嘗夜登城守者不許左右曰中丞也對曰夜不可辨乃還明日擢守者為大將

李洪正

為武寧節度使徐自王智興後吏卒驕縱不法洪正戮其尤無狀者終洪正治不敢譁

段

秀實

為涇州刺史時郭子儀以副元帥居蒲子晞以檢校為尚書領行營節度使屯邠士放縱不法邠人

之嗜惡者納賄竄名伍中因肆志吏不得問白晝羣行丐頡于市有不恤輒擊傷市人推釜鬲甕盎盈道至撞害孕婦孝德不敢劾秀實自州以狀白府俄而晞士十七人入市取酒刺酒翁壞釀器秀實列卒取之斷首置槩上植市門外一營大譟盡甲孝德恐召秀實曰奈何秀實曰請辭於軍乃解佩刀選老嫗一人持馬至晞門下甲者出秀實笑且入曰殺一老卒何甲也吾戴頭來矣甲者愕貽因曉之曰尚書固負若耶副元帥固負若屬耶奈何欲以亂敗郭氏晞叱左右皆解甲令曰敢譁者死

所過樵蘇無犯

李晟拜神策行

營節度使進臨渭北壁東渭橋所過樵蘇無犯時劉德信自扈澗歸亦次渭南軍驚無制德信入謁晟晟責所以敗斬之以數騎入整衆山立王雄誕每破城邑整衆山立無絲毫犯按壁勞其軍無敢動

甲不戰

竇建德五月自坂堵出為陣秦王登虎牢城望其軍按甲不戰曰賊起山東未嘗見大敵今度

險士罷令不肅也逼城而陣有輕我心待其飢破之果矣卒已附親而罰不行者則

不可用也故令之以文齊之以武是謂必取

文恩武罰令素行以

教其人者也令素行則人服令素不行則人不服令素信著者與衆相得也厚而不能使愛而不能令亂而不能治譬如驕軍政曰言不相聞故為鼓鐸視不相見故為旌旗夫金

鼓旗幟者所以一人之耳目也人既專一則勇者不得獨進怯者不得獨退

法者曲制官道

主用也

注謂曲制者部曲幡幟金鼓之制也官者百官之分用也道者糧路也主用者主軍費用也同

上兵軍門不夜開

段志玄文德皇后之葬與宇文士及勒兵衛章武門太宗夜遣使至二將

軍所士及披戶納使志玄拒曰軍門不夜開使者示手詔志玄曰夜不能辨不納比曙帝歎曰真將軍周亞夫

何以

斬奴

竇軌還蜀初以其甥為腹心每夜出呼不時至斬之人戒家奴毋出外忽遣奴取漿公厨

既而悔焉曰要當偕汝頭以明法命斬奴奴稱冤監刑者疑不時決軌并斬之

持法嚴

李勣持法嚴故

人為

按軍尚威嚴

武攸宜討契丹表陳子昂參謀攸宜輕易無將畧子昂諫曰按軍尚威嚴

按邊撫師賞罰必直功罪

張仁愿為特號令嚴將吏信伏按邊撫師賞罰必直功罪

軍政大治

王沛進拜兗海沂密節度使是時新建府俗獷驚沛明示法制蒐閱以時軍政大治用

命

王逢從劉沔石雄破回鶻於天德有士二十人未嘗

戰欲冒賞賜逢不與或為請之答曰士奮死取賞若

無功而賞何哉武宗以逢用法嚴使宰相李德裕讓之逢曰戰者前蹈白刃不以法人孰用命

殘馬璘在涇八年令肅不殘人樂政令無所統一哥舒

潼關病痼不能事以軍政委良工使王思禮主騎字承光主步三人爭長政令無所統一眾攜弛無守意李

光弼贊曰

生戎羌之緒沈驚有守遭祿山變披任兵柄其策敵制勝不世出賞信罰明士卒爭奮戮

然有古良將風鼓而行角而止

韋雲起契丹寇營州詔雲起護突厥兵討之啓民可汗以二萬

騎受節度雲起使離為二十屯屯相聯絡四道並引令曰鼓而行角而止非公使母走馬三喻五復之既而紇

斤一人犯令即斬以徇於是突厥突厥傳杜牧曰多喪苗長入謁者皆膝而進莫敢仰視

顛翻大都則跳身而來刺邦而去回視刀鋸菜色甚安
一歲未更已立於壇墀之上此輕罰之過其敗四也

號令隱然士氣皆起

王鐸為義成節度使諸道行營都統於是表崔安潛自副鄭昌圖等

在幕府以周岌王重榮諸葛爽康實安師儒時溥六節
度為將佐而中尉西門思恭為監軍率衛兵泊梁蜀師
三萬壁藍屋移檄天下先是諸將雖環賊莫肯先及鐸
檄至號令隱然士氣皆起爭欲破賊故崇戰數感官人
田令孜策賊必破欲使功

恃權撓政

姚南仲為義成節度使監軍薛盈珍

出於己乃搆於帝罷之
恃權撓政不能逞因毀南仲於朝德宗感之南仲不自
安固請入朝帝勞曰盈珍撓卿政耶曰不撓臣政但墮
陛下法耳如盈珍輩所在有之雖使羊杜復生撫百
姓御三軍必不能成豈弟之化而正師律也正傳

白孔六帖卷五十一

欽定四庫全書

白孔六帖卷五十二

唐白居易原本

宋孔傳續撰

訓練

一

禁暴

二

用刑

三

示必死

四

戰死

五

行惠

六

不撫士

七

示信

八

有禮

九

軍整

十

謀畧 十一

料敵 十二

訓練 一

理兵附

白銳敏

精勇

簡練

孟秋天子命將帥選士勵兵簡練傑

俊專任有功以征不義詰誅暴慢

銳師

訓必勝之衆

練費勇之夫

士有陷堅之銳

訓旅觀兵

振鐸

號令也

戒爾車乘

厲兵

林馬

繕甲

治兵

訓卒

利鬪志

卒乘輯

睦

蒐乘

補卒

脩我甲兵

簡兵

蒐乘

陳師鞠旅

振旅闐闐

不教民戰是謂棄之

御一心之衆

舉百勝之師

戮力

三

年而治兵以數軍實

訓熊羆之旅

修我戈矛

我武

惟揚鞭七人貫三人耳

子玉治兵於焉

不戮一人

子文治兵

秋大閱

簡車馬

講武

講事

皆為農隙

然令未申嚴

師非訓練

既無訓卒

何以成功率素厲以行必無勇也驅白徒而戰是謂棄之

素勵空猛

非勇也白徒不習訓之師也

行孫武之法

治子文之兵

簡其兵器

周禮

大

司馬仲春教振旅辨鼓鐸之用以教坐作進退疾徐疏數

之節

皆戰法

遂以蒐田仲夏教茆舍如振旅辨名號之用

遂以苗田仲秋教治兵辨旗物之用遂以獮田仲冬大閱

修戰法遂以狩田

王孫賈治軍旅

申嚴

季冬命將

帥講武習射御角力乃教田獵以習五戎班馬政命僕夫

七騶咸駕載旌旄授車以級整設于屏外司徒搢扑北面

以誓之

誓衆以軍法

天子乃厲飾執弓挾矢以獵

厲飾謂衣戎服也月令

有發則命大司徒教士以車甲

發發軍也禮

明耻

戰教

將整堂堂

之陣

必訓起之夫

訓戎

戰教

載績武功

績繼也

晉作被廬之蒐楚自

克庸以來無日不討軍實而申做之

傳

出曰治兵入曰振

旅

公羊

三時務農一時講武

一時冬也

故征則有威守則有材

國語號

管仲寄軍政

具軍政門

連率比年簡車

十國為連有率

卒

正三年簡徒

三十國為率有正牧

羣牧五載大簡車徒

三百國為州州

有斬牲

郊禮畢始揚威武斬牲以薦太常令謁者一人載以護車馳送陵廟還宮遣齋東帛賜文武肆

牧習職之儀斬牲之禮名曰軀劉

建而不旆

傳曰晉治兵甲車四千乘建而不旆壬申旆之諸侯

畏之注將戰則旆不戰則不旆

鬪場後漢咸和中詔內外軍戲兵於南郊之場名曰鬪場

孔舉動

安重

來瑱能撫訓士舉動安重賊不能侵

校旗

郝廷玉曰王善御軍賞當功罰適過每校旗不如令

者輒斬人皆自效而赴蹈馳突心破膽裂自臨淮歿無復校旗事

閱武力

顧少連為東都留守閱武

力利鎧仗號良吏

郭子儀奏曰

願陛下付臣以訓兵禦侮則中興之功日月可冀

講兵

與諸鎮抗

王處存徙節度河中歲時講兵與諸鎮抗無能侵軋者

突厥序杜牧曰

天下無事時大臣偷處榮逸戰士離落兵甲鈍弊車馬
利弱天下雖然盜發則疾驅以戰是謂宿敗之師此不
蒐練之過其訓勉士卒必流涕屈突通其訓勉士卒必
流涕故力雖窮而人尚

為之選徒練旅有眾孔武柳宗
元興州江運記號令齊一贊皇一品集
牛僧孺等公

感奮御集議自古所云烏合之眾皆謂臨時召募未經訓習
如韓信驅市人而戰即是烏合陳許溫青等兵並是節
制等師久經戰伐但令一處指揮料擇伏瘴舊獠與州

兵之任戰者李德裕徙劍南節度使料擇伏瘴舊獠與
州兵之任戰者廢遣僱耄十三四士無敢

怨又請甲人於安定弓人河中弩人浙西由是蜀之器
械皆犀利銳率戶二百取一人使習戰貸勿事緩則農急

則戰謂之已未講武於繁臺梁開平
元年訓練強兵動鬼神

雄邊子弟

杜甫寄教練羽林兒

同

獨任崇文

高崇文為長武城使劉闢阻兵朝議討伐

宰臣杜黃裳以為獨任崇文可以成功宿將專征者甚衆人人自謂當選及詔出大驚崇文在長武城練卒五千常若寇至及是中使至長武卽時宣命而辰選將練時出師五千器用無闕者八大職皆大捷舊史

兵甚有法

五代梁臣朱珍太祖初鎮宣武珍為太祖選將練兵甚有法太祖得諸將所募兵及佗降

兵皆以屬珍

府兵其能騎而射者為越騎

其餘為步兵武騎排攢手步射每歲

季冬折衝都尉率五校兵馬之在府者置左右二校尉兵志

禁暴二

白兵猶火也不戢將自焚 整旅 將何以戰 黷武

吳侵陳斬祀殺厲謂之殺厲之師

厲病也祀神屋

武有七德

禁暴戢兵

暴而不戢安得定功

上武糾暴

糾察也周禮

軍禁

師禁

申嚴號令

月凡執禁以齊衆

知防

掠人贖

武苟不戢兵

何以爲將何以制敵

吳師斬祀

見上

羊祜反禾曹公

敗麥

俱見上注

師必有名

莫先率義

如或不能戢兵

則將焉用彼將

責帥

能當陳之隧

井堙

木刊

將求衆整

必在行

整烏合

之衆訓鷹揚之師

豈宜不戢

整軍而經武孔列卒斷首

置樂上

段秀實郭晞屯邠州士放縱不法白孝德為節度使不敢劾俄而晞士十七人入市取酒刺酒

翁壞釀器秀實列卒取之
斷首置櫟上植市門外

禁止暴兵

獨孤及上疏陛下
宜禁止暴兵節用

愛人折逆旅七箸

高崇文過興元士有折
逆旅七箸者即斬以徇

衛士等共擊之

突利子賀邏鶻帝幸九成宮突利弟結社率以郎將宿
衛陰結種人謀反劫賀邏鶻北還謂其黨曰我聞晉王
丁夜得辟仗出我乘間突進可犯行在是夕大風冥王
不出結社率恐謀漏即射中營譟而殺人衛士等共擊
之乃走殺廐人盜馬欲度渭微邏擒斬之赦賀邏鶻投嶺外突厥
訖無犯者藩鎮李載義始回鶻
使者歲入朝所過暴慢吏不敢呵禁但嚴兵自守虜
習益警悍至鞭候人剽突市區時大酋李暢者曉華人
語尤凶黠既就館橫須索扶疾郵人載義召暢語曰可
汗以舅甥故使將軍朝貢誼不容將軍暴也天子厚饗
餽以禮客有不謹吏皆論死若將軍所部不戢而效攘
自如我必殺所犯者將軍其少戒因悉罷所防兵以兩

卒護闕暢嚴憚之訖無犯者

禁暴安人為將臣之良

李抱玉在鎮十餘年雖無破虜

功而禁暴安人為將臣之良

殺賊取功

劉崇望玉山都將揚守信反夜陳兵闕下帝列兵延喜門

命崇望守度支庫紮旦舍光門未開禁卒左右植立將大掠長安中俄聞傳呼宰相來者門闕崇望駐馬勞曰上自將在中營公等禁軍也不帝前殺賊取功而苟欲剽掠成寇名乎士皆唯唯至長樂門賊望兵至乃遁去軍中咸呼萬歲是日京師不亂繫其力

用刑三

白軍旅之事叛而不討

何以示威

訓必勝之師

罪非無赦

勵陷堅

之卒

令在惟行

猛以濟寬

威克厥愛戎昭果毅易之戮也

整軍而經武 師出以律否臧凶易 刑者戰之器也

中叔時云 師衆以順為武軍士有死無犯為敬魏絳曰 揚干亂

行魏絳用鉞戮其僕也 臣干旗鼓犯令也 三罪而人服晉文公 士

唯聞將軍之令亞夫軍細柳 師以嚴終功用威克 屬在戎行貞其師律

鞭七貫三雖爽理兵之體罰一勸百宜 有令必行無瑕可戮

立武知禁守文經武 戮其犯命者周禮 又察軍慝慝陰姦也

軍刑周禮 不用命戮于社書 軍禁周禮 師執禁以齊衆不赦

過禮禮 大為防而猶踰小不忍 若施用刑之威恐貽責明

恥戰教撓孫吳之法

仁而武

無能違也

愛克厥威

齊之以

法訓鷹揚之師

先令宜定

整烏合之衆

刑在必行

率職用威

齊人以法

敗軍責帥

受榮既等於秦彭

用鉞何殊於魏絳

用法

伏辜魏絳

戮楊干之僕

陸遜髡孫松之吏

見上注

孔斬千二百人

曹華擢橫海軍節度副使時朝廷披鄆為三鎮其明年
兗海軍亂殺觀察使王遂詔華往代視事三日合軍大
饗幕甲士于廬酒中令曰天子以鄆人參列而戎有轉
從勞欲厚賞之請鄆人右州人左既而出州兵乃闔門
大言天子有命誅殺帥者甲起于幕環之凡斬千二百
人血流殷渠赤氛冒門高丈餘海沂之人重足屏息
鞭背周墀拜義成節度使宿將暴警不殺人流血李希烈資

慘害臨戰陣殺人流血於前而飲食自若也

驅人填塹

乘襄城之捷進攻汴州入之運土木治道

怒不如程駟人填塹號濕梢

斬崔衆以徇軍

光弼以景城河間兵五千入太原前此節度使

王承業政弛謬侍御史崔衆主兵太原每侮狎承業光弼素不平及是詔衆以兵付光弼衆素狂易見光弼長

揖不即付兵光弼怒收繫之會使者至拜衆御史中丞光弼曰衆有罪已前繫今但斬侍御史若使者宣詔亦

斬中丞使者內詔不敢出乃斬衆以徇威震三軍

繁臺之誅

五代杜重威初契丹留燕兵千五百

人在京師高祖入自太原入告者言其將反高祖悉誅於繁臺其亡者葬于鄴燕將張璉先以兵二千在鄴聞

燕兵見殺乃勸重威固守高祖已殺燕兵悔之數遣人招璉等璉登城呼曰繁臺之誅燕兵何罪既無生理請

以死守重威食盡屑麴而食

朝鼎夕砧

蘇頌今吐蕃遣渠領千犯國令軍吏一不勝而陛下屈至

尊為之敵雖朝鼎夕臨賊境而害主將李國貞死以郭子儀代之及子

砧猶未足以夸四夷

儀至王振自謂且見德子儀怒曰汝臨賊境而害主將賊若乘虛是無絳奕又欲為功乎即斬以徇

示必死四

白背水

韓信為背水陣下井陘

焚舟

傳孟明伐晉濟河焚舟注示必死不復渡也

塞井

夷竈

皆示必死

歌虞殯具吟玉

吳伐齊齊公孫夏命其徒歌虞殯陳子行命其徒具吟玉

皆示必死

率先士卒

整無敵之旅

厲必死之夫

其可敵乎

誰能禦之

躬擐甲胄

親授矢石

莫有死志

使三軍之士視死如歸

李陵

湛舟

破釜甑燒廬舍

項羽伐秦渡河乃破釜甑燒廬舍持三日糧示必死無還心於

是大破秦軍

臨難毋苟免

禮

死志

統率先之卒

誓以身忘

握尚

右之兵

示其必死

白刃可蹈

衽金革死而不厭

衽席

孔鬪

死有名

荔非元禮光弼守河陽周摯攻北城出戰擊軍小却元禮以敵堅未可以馳還軍示弱怠其意

光弼怒使召元禮欲按軍法答曰方戰不及往顧麾下曰鬪死有名無庸受戮乃下馬持刀瞋目直前銳士堵

而進左右奮擊一當數人斬賊數百首

內刀於鞞

李光弼為天下兵馬副元帥將戰內刀於鞞曰

戰危事吾位三公不可辱于賊萬有一不捷當自刎以謝天子及思明奔西河拜舞三軍感動

許以死

又史思明將李日越請降雍希顥與俱至光弼厚待之表授特進兼金吾大將軍高暉聞亦降或問公降二將

何易也光弼曰思明再敗恨不得野戰聞我野次彼固易之命將來襲必許以死希顥無名不足以為功日越

懼死不降何待高暉材出日越之

效死秋

張說為天平軍大使朔方

大使王賧誅河曲降羌阿布思也九姓同羅拔野固等皆疑懼說持節從輕騎二十直詣其部宿帳下召見酋豪慰安之副使李憲以羌難信不宜涉不測說報曰吾肉非黃羊不畏其食血非野馬不畏其刺士當見危致命亦吾效死秋也

蹈萬死取一生

李嗣業廣平王收長安嗣業統前軍陣于

香積祠北賊酋李歸仁擁精騎薄職王師注矢逐之走未及營賊大出掩追騎還蹂王師於是亂不能陣嗣業謂子儀曰今日不蹈萬死取一生則軍無類矣即袒持長刀大呼出陣前殺數十人陣復整步卒二千以陌刀長柯斧堵進所向無前歸仁匿兵營左覘軍勢王分回紇銳兵擊其伏嗣業出賊背合攻之自日中至是斬首六萬級填澗壑死幾不介胄而馳

來濟突厥入寇濟總兵拒之謂其衆曰吾

嘗絀刑罔蒙赦死今當以身塞責遂不介冑而馳賊沒焉

戰死五

白以死繼之 死寇 視死如歸 衽金革死而不厭

死衛國家 吾未獲死所

狼瞞曰

喪歸

灌孟戰死軍法父子俱從軍有

死事得與喪歸灌夫不肯歸願取吳將報父讐也

為轡歸

高詔從軍死者為轡歸其縣給衣衾葬具

祠以少牢 刻木葬

曹公領兖州牧擊黃巾鮑信戰死購求信喪不獲乃刻木為信祭而葬之

襄老死於邲不獲屍

傳

義貫幽魂

德光往業

孔房玄齡上疏

曰 陛下先決死罪必三覆五奏進疏食傳音樂以人命之重為感慟也今士無一罪驅之行陣之間委之鋒

鏑之下使肝腦塗地老父孤子寡妻慈母望輅車抱枯骨摧心掩泣其所以變動陰陽傷害和氣實天下之痛

也
士死麻葦

房瑄敗士死麻葦

兄弟死於陣子姓沒於軍

僕思

上書陳情曰先帝委臣以兵誓雪國讐攻城野戰身死士卒兄弟死於陣子姓沒於軍九族之內十不一在而

存者瘡痍滿身

露齒蔽野

李光弼傳安祿山反自顏杲卿死郡為戰區露齒蔽野光弼酌而哭之

被髮呼天血流出背

懷光反是夕奪二軍惠元建徽走奉天懷光遣將冉宗馳騎追及於

好時惠元被髮呼天血流出皆袒裼戰而死陽惠元傳

力戰而死

五代王清杜重威遣與宋彥筠

俱前清與羌戰敗之奪其橋是時重威已有貳志猶豫不肯進彥筠亦退走清曰吾獨死於此矣因力戰而死

歿于陣

五代史彥超周兵伐漢太原契丹救漢出忻代世宗遣符彥卿拒之以彥超為先鋒戰忻口彥

超勇憤俱發左右馳擊解而復合者數四遂殁于陣是時世宗敗漢高平乘勝而進圍城之役諸將議不一故久無成功世宗欲解去而死戰猶足報國

五代皇甫遇羌兵與遇戰

未訣聞彥超戰死遽班師自午至未解而復合益出生兵勢甚盛遇戒慕容彥超曰今日之勢戰與走爾戰尚或生走則死也等死死戰猶足報國張從恩與諸將惟遇視羌無報皆謂遇已陷于羌矣已而有馳騎報遇被圍安審琦率兵將赴之

士戰歿者皆遣使弔祭

劉仁軌先是貞觀永徽中士戰歿者皆遣使弔祭或以贈官推

授子弟顯慶後討伐恩賞殆絕仁軌具論其弊請加慰賚以鼓士心

士有戰死以其妻殉

杜伏威士有戰死以其妻殉故人自奮戰無完敵

王清從杜重威軍中渡橋南

羌軍其北以相拒

五代史

行惠六

白勤恤其人

與之勞逸

熟食者分而後食

吳闔廬在軍云

云

君子不重傷慈愛戰所畜也

士為

挾纊

楚子伐蕭師人多寒王循

三軍撫而勉之三軍之士皆如挾纊

德以施惠戰所由克

申叔時曰

愛克厥威

允罔功

書恩加挾纊

念師人多寒

惠表投醪

感戰士之俱醉

置金廡

下

史記吳楚反上拜竇嬰為大將軍賜金千斤嬰陳於廡下將士過者令裁取為用裁酌也封魏其侯

國懷恩

後漢耿秉字伯初為征西將軍單于懷恩及聞卒舉國發哀刺面流血

小人懷惠

小惠未徧

曹劌曰

惠則足以使人

施惠

禮

立已推誠

示人以惠

大事在戎

是重握兵之要

小人懷惠

必資挾纘之恩

御

衆在寬

使人由惠

觴酒豆肉未嘗不分

國語趙王勾踐將伐吳謂申包胥曰在孤

側者觴酒豆肉未嘗不分國中疾者吾問之死者吾葬之長其孤問其老

記曰宋陽門之介

夫死司城子罕哭之哀晉人之覘宋者反報於晉侯曰

宋不可伐子曰善覘國乎

其所嘗者卒乘與焉

闔廬衛

士請留報德

漢蓋寬饒次公為衛司馬躬撫士卒視其飲食居處撫循疾病致醫藥及歲終交代

衛士數千人叩頭願自留一年報寬饒厚德宣帝嘉之

士卒不盡飲不近水不盡

餐不嘗食

李廣得賞賜分麾下見水云云士樂為用也

吮卒疽

史吳起為將士卒最下者

同衣食卧不設席行不騎乘親裹贏糧與士卒分勞卒有病疽者起為吮之其母哭曰往年吳公吮其父父戰不旋踵而死於敵今又吮此子妾不知死所矣

分賜縑

後漢董卓字仲穎得賜縑悉分吏兵曰無者則

已有者則士

裹創

後漢段穎愛士卒手與裹創行軍未嘗辱寢與士同勞苦

分賜絹與亡

者家

魏志孫禮為揚州刺史與吳全琮戰賊退詔賜絹七百匹禮為死者設祭哀臨以絹付亡者家無自

入已

壞帳為士襦袴

晉謝尚字仁祖為歷陽守始到官郡以布三十匹為尚造烏布帳尚

壞之以為軍士襦袴

載稻與脂

國語勾踐命當室者死三年釋政支子死三月釋政親載稻與脂於

舟以行國之孺子游者無不餽也無不歡也必問其名非身種夫人織則不衣食也

魯昭公伐季

氏子家子曰政自之出久矣隱民多取食為之徒者衆

矣傳 脫衣歛

後漢王霸字元伯善撫士卒死者脫衣歛之

聞持更聲苦

劉弘為荆

州嘗夜起聞城上持更者歎聲甚苦呼省之年過六十羸瘦無襦弘謫主者仍給韋袍複帽也

孔民知

有生之樂

裴度初元濟禁偶語於道夜不然燭酒食相饋遺者以軍法論度視事下令唯盜賊鬪死

抵法餘一蠲除往來不限晝夜民始知有生之樂

與下同苦

李晟收復京師時輸縑不屬盛夏士

有衣裘者晟能與下同其苦

視其資糧存問家室

李勉遣戍兵常視其資糧存問家室

故能得人死力

士卒病親存問所欲

劉濞拜春州刺史屯普潤軍中不設音樂士卒病親

存問所欲不韋死哭之

婚嫁皆厚資

韋臯善拊士至雖婚嫁皆厚資之壻給錦衣女給銀塗衣

賜各萬錢死喪者稱是

賊降輒聽其便

李愬為隨唐鄧節度使愬推誠待士故能張其卑弱

而用之賊來降輒聽其便或父母與孤未葬者給粟帛遣還勞之曰而亦王人也無棄親戚衆願為愬死故山川險易與賊情偽一能曉之

身居戟户踰月

任迪簡為節度使代張茂昭承茂昭奢縱後公

私屈乏欲饗士無所給至與下同糲食身居得士心重

嗣以耆將兼節度滄景出行伍善撫士與下同甘苦蔡將李端降重嗣蔡人執其妻殺之妻呼曰善事烏僕射

得士心大抵如此下樂為用李光顏善撫士金帛散士卒李勣

得金帛盡散之士卒無私財安足麤淡與天下共勞苦殷侑拜義昌節度使單身

之官安足麤淡與天下安邊不生事王忠嗣徙河東節度使忠嗣本負勇

敢及為將乃能持重安邊不生事嘗曰平世司空李勣為將撫衆而已吾不欲竭中國力以幸功名

每會將兵在軍

識其藏否聞人片善扼腕而從事捷之日多推功於下前後在軍所得金帛皆

散之將士以是人皆為用所向多克捷

衛兵數逃請聽

納室

裴矩煬帝幸江都宮是時衛兵數逃去帝憂之以問矩矩曰今乘輿淹狩已二年諸驍果皆無家人

無匹合則不久安臣請皆聽納室帝笑曰公定多智因詔矩盡召江都女子孀家恣將士所欲即配之人情翕然相悅曰裴公惠也宇文化及亂

士皆感慰

盧坦吳少誠之誅詔

衆劫矩賊皆曰裴黃門無豫也

以兵二千屯安州坦每朔望使人問其父母妻子視疾病醫藥故士皆感慰無逃還者

厚給

柳公綽徙

鄂岳觀察使時方討吳元濟詔發鄂岳卒五千隸安州軍出公綽數省問其家疾病生死厚給之

朝廷

賜與悉分士伍

石雄為晉絳行營諸軍副使雄臨財廉每朝廷賜與輒置軍門自取一匹縑餘

悉分士伍由是

先冬頒衣絮

錢徽樊澤署掌書記蔡賦方熾澤多募武士于軍澤

卒士頗希賞周徽主留事重擅發軍廩不敢給時大雨雪士寒凍徽先冬頒衣絮士乃大悅

傷夷病

疾親為營護

李愬士傷夷病疾親為營護

戰得金寶盡散

李密戰得金寶盡散

之繇是用裂帷幄以衣士卒

吳巖守貝州善撫士卒會天大寒裂其帷幄以衣士卒

卒皆愛之

路人送者皆號泣

五代牛存節為潞州都指揮使太祖召存節為將法

令嚴整而

除去苛暴昭宣惠

和元鎮鎮州制田弘正首除去苛暴昭宣惠和愛

人如身養士如子拊循教訓必以忠孝為先是以魏之師徒一年而知恩二年而知禮三年而知讓相與於道

矣開心待人

南霁雲至睢陽與張巡計事退謂人曰張公開心待人真吾所事也遂留巡所葬

戰死之骨增以延賞

憐刀傷之肌荐其廩給抑文賀平淄青狀

與士卒同甘

苦

五代王廷胤為人驍勇自為軍校能與士卒同甘苦

亡卒多賴以全活

五代王敬瑄梁

兵攻吳龐師古死清口敗兵亡歸過潁大雪士卒饑凍敬瑄乃泐淮積薪為燎為作糜粥餉之亡卒多賴以全活

不撫士

七

白母閉門不納

楚子反攻秦士卒分菽糧而食將軍芻黍黍稷戰敗母閉門不納

佩玉

藥兮余無所繫之

吳申叔儀乞糧於公孫有山氏云云

旨酒一盞兮予與

褐之人睨之

睨邪視也言己與被褐之人同得視之不得飲傳言吳王夫差不恤士也

衛懿

公好鶴鶴有乘軒者將戰國人授甲皆曰使鶴鶴實有

祿位予焉能戰

傳

躡鞠

漢嫖姚將軍霍去病少貴不省士其從軍上遣大官齎數十乘

而士有饑色其在塞外卒乏糧不能自振去病尚謂將穿城躡鞠注穿地作鞠室為之實以毛氈蹋而戲

為卒

晉謝萬受任北征常以嘯詠自高未嘗撫衆兄安謂曰諸將宜數接對以悅其心乃集諸將以如意

指四座云諸將皆勁卒也將益恨之

將不省兵

晁錯云

關侯善待卒而驕士

大夫張飛愛敬君子不恤小人

蜀志

乞襦不與

晉宣帝仲達兵士寒

凍乞襦帝不與或曰王府故襦可以賜之帝曰襦者官物人臣無私施

孔餉道乏

韋待價拜安息

道行軍大總管天大寒待價不善撫御師人多死餉道乏乃旋師

不恤士

李密既殺翟讓心稍驕不

恤故繒陳綵皇甫鎛帝斥內帑所餘詔度支評直鎛貴售之以給邊兵故繒陳綵觸手輒壞士怨

怒聚焚之裴度以其事聞鎛指所著鞞曰此內庫所出牢鞞可服彼言不可用詐也帝信之託責士

皆曰反囚

張弘靖其誥責士皆曰反囚嘗曰天下無事而輩挽兩石弓不如識一丁字軍中以氣自

任銜償直以鹽陸長源董晉卒長源總留後事大言曰將士久慢吾且以法治之衆始懼軍中

請出帑帛為晉制服不許固請止給其直孟叔度希望入償直以鹽乃高鹽直賤帛估人得鹽二斤舉軍大怒

或勸長源曰故事有大變則厚賜于軍軍乃安長源曰異時河北賊以錢買戍卒取旌節吾不忍為衆怒益甚

長源性剛不適變又不為備纔八日軍亂殺長源及叔度等食其肉**治裝悉帑以行**程日華為

張孝忠牙將滄故成德部州也孝忠絕李惟岳德宗以滄畀義武前刺史李固烈與惟岳姻屬即牢守孝忠令

日華往喻之固烈請還恆州既治裝悉帑以行軍中怒曰馬瘠士飢死刺史不棄毫髮恤吾急今刮地以去吾等何望遂共殺米杞不饜哥舒翰為人嚴少恩軍行未固烈屠其家

米杞不饜

哥舒翰為人嚴少恩軍行未嘗恤士飢寒有啗民樵者痛

笞辱之監軍李大宜在軍中不治事與將士搏捕飲酒彈箜篌琵琶為樂而士米杞不饜帝令中人袁思藝勞師士皆訴衣服穿空帝即斥御服餘者製袍軍士苦大

熱

范延光反遣牙將孫銳澶州刺史馮暉以兵二萬距黎陽掠滑衛高祖以楊光遠為招討使弘兵自滑州

渡胡梁攻之銳輕脫無謀兵行以娼女十餘自隨張蓋操扇酣歌飲食自若軍士苦大熱皆不為用光遠得其謀誘銳等渡河半濟而擊之兵多溺死五代史

倡優捕簍相娛樂渾隴武士飯

糲米日不厭而責死戰其敗固宜

高適

損糧以漁利

季叔良武

德初被命鎮涇州捍薛仁果仁杲內史令翟長孫以衆降於是大饑米十千錢叔良不恤士損糧以漁利下皆怨
皆帶飢寒辛替否疏當今發一卒以禦邊陲追一兵以衛社稷多無衣食皆帶飢寒賞賜之間迴無所出軍旅驟敗莫不由斯

示信八

事具信門

白古之為軍不以險阻 申叔時曰禮信戰之器也

信以守物戰所由克 晉侯欲用人子犯曰人未知信

未宣其用於是乎伐原以示之信

晉侯伐原命三日之糧原不降命去之謀

出曰原將降矣軍吏請待之公曰得能以德攻君子謂原失信何以使人退一舍而原降也

晉於是

後不待期而薄人於險無勇也

胥甲趙穿當晉軍門而呼曰云云

與敵

人剋日戰

晉羊祜叔子為鎮南每與敵人剋日戰而不為掩襲之計

授律即戎

位既崇於

四推誠示信

言不可於二三

推己貴誠

訓戎在信

仗信

推誠

示人以信

能軍

訓戎

饋藥不疑

晉羊祜為鎮南以德綏懷吳將陸抗疾祜遺之藥抗服之或疑止之

抗曰羊公豈

互市

吳之未平周俊字士林在弋陽南北為互市而諸將多相襲奪以為功吳

酖人者哉

將于敏守沔中其兄珪與敏書曰慎無為小利忘大備候者得書呈俊俊曰君子也

孔以蔡牙卒

侍帳下

裴度以蔡牙卒侍帳下或謂反側未安不可去備度笑曰吾為彰義節度元惡已擒人皆吾人

也眾以恩信為士卒所服

段秀實擢光祿少卿俄而元禮為麾下所殺將佐多死惟

秀實以恩信為士卒所服皆羅拜不敢害示以至誠郭子儀傳僕固懷恩誘

三十萬掠涇邠躡鳳翔入醴泉奉天京師大震急召子儀屯涇陽軍纔萬人比到虜騎圍已合子儀將出左右

諫戎狄野心不可信子儀曰虜眾置一指以示信張巡數十倍今力不敵吾將示以至誠傳南

霽雲見賀蘭進明愛霽雲壯士欲留之霽雲泣請置一指以示信歸報中丞也因拔佩刀斷指一座大驚為出

涕對榻卧起孔戩鄭滑盧犀辟為判官犀卒總攝留務監軍楊志謙雅自肆眾皆怨戩邀志謙至

府與對榻卧起示不疑志謙憚嚴不敢動鄧艾得田章既登長驅縣竹魏平

疇為導潛出盧龍鄧艾得田章既登長驅縣竹紀聖功頌

夏有一旅之眾武有十人之同保茲誠信一品集與點志定金石信非盟誓爾其念哉憂可汗書豈

必盤經路之金舉留犂之酒保茲誠信固在厥初

推誠待士

李愬推誠待士故能張其卑弱而用

之披而示之心

馬燧賊將徐庭光守長春宮城燧度長春不下則懷光固守久攻所傷必衆乃

挺身至城下見廷光廷光憚燧威拜城上燧顧其心已屈徐曰我自朝廷來可西向受命廷光再拜燧曰公等朔方士自祿山以來功高天下奈何棄之為族滅計若從吾言非止免禍富貴可遂也未對燧曰爾以吾為欺邪今不遠數步可射我披而示之心廷光感泣一軍皆流涕即率衆降燧以數騎入其城衆大呼曰吾等更為王人

頡利請和

翌日刑白馬與盟薛延陀回紇諸部皆叛使突利討之不勝懼王師引兵入朔

州議者責其敗約因伐之帝曰匹夫不可為不信況國乎我既與之盟豈利其災邀險以取之邪頡利傳

有禮九

禮軍容附

白晉侯觀其師曰少長有禮其可用也傳輕則寡謀無

禮則脫

脫輕也

秦師輕而無禮必敗

過周北門王孫滿觀之云云

師克

在和 禮樂慈愛戰所畜也 申叔時曰禮信戰之器

也禮以順時 戰所由克 有嚴有翼 軍旅有禮故

武功成 軍容 戎政 晉侯教人三年欲用之子犯

曰人未知禮未生其恭於是大蒐以示之禮 能以德

攻 兵交使在其間可也 人於是大服 軍旅之容

暨暨 殺人之中

又有禮焉

齊衆

班朝治軍涖官行法非

禮威嚴不行

禮

戎容

禮

軍旅什伍同爵則尚齒而弟達

乎軍旅矣

戎昭

師

堂堂之陣棣棣之容

戎行

戎

政貴明

軍容尚肅

能軍

訓

聞喪而還

傳

曰陳成公卒楚人將伐陳聞喪而還禮也禮

不伐喪

狂狡失禮違命宜其為擒也

狂狡宋大夫為鄭所獲

戎昭果

毅以聽之之謂禮 易之戮也

介冑之士不拜為其

拜而菱拜也

禮

率軍禮以長揖

西征賦

說周亞夫

軍容詒詒

教

嚴也

色容厲厲

肅也

戎容暨暨

果毅也

介冑有不可犯之色孔

橐鞬謁道左

李回

張仲武合太原軍攻潞復以回為使督職至蒲東王宰石雄橐鞬謁道左回不

弛行顧左右呼
直史責破賊限

循循有禮遜

吳淑遣大將軍激循循有禮遜無倨氣矜色見重朝

廷

具軍容伏謁

柳公綽山南東道節度牛僧孺罷政事為武昌節度使公綽具軍容伏謁

具

軍容迎灞上

郭子儀收東都入朝帝遣具軍容迎灞上勞之曰國家再造卿力也子儀頓首謝

以宰相禮受謁

李愬入蔡州乃屯兵鞠場以俟裴度至愬以縶韉見度將避之愬曰此方廢上

下分久矣請因示之度以宰相禮受愬謁蔡人聳觀乃還屯文城柵

廝養必整衣見

張巡雖廝

養必整衣見之

與部曲語未嘗不名

史匡翰為將沈毅有謀而接下以禮與部曲語未嘗

不名五代史

計元濟且望救於董重質以書召重質

李愬入蔡計元

濟且望救於董重質乃訪其家慰安之使無怖以書召重質重質以單騎白衣降愬待以禮

軍整十

白不整則喪列

傳

齊救鄭陳成子帥師違穀七里穀人

不知

違去也 不知言軍整也

漢王入關秋毫無犯不掠

後漢世祖問諸將所

得物惟李忠無所掠世祖

又

吳志孫皓督夏口兵侯獲美女進皓皓更衣服還之

賜所乘大驪馬及繡被

下令曰今所誅者曹氏百姓何罪不得繫老弱於是多附也

百姓安堵

蜀志諸葛亮悉大衆由斜

谷出五丈原分兵屯田耕者雜於渭濱百姓安堵軍無私焉

又

晉陶侃戎政齊肅士卒無私

不樵

樹不採藝舍不為暴好以衆整

晉樂鉞對楚子重

送絹酬禾

晉羊

枯入吳境刈穀為糧送絹酬之

孔師屯大達市井不移

高崇文劉闢陷東川其將李文

悅執關子方叔壻蘇姜遂趣成都餘兵皆面縛送款闕走追擒之檻送京師入成都也師屯大達市井不移珍

寶如山無持法嚴整王恩禮持法嚴整士不敢犯坊人遠者宿昔乃

知王師之入李晟引軍屯含元外延舍右金吾次令軍中曰五日內不得輒通家問違者斬遣京

兆尹李齊運部長安萬年令分慰居人秋毫無所擾別將高明曜取賊妓一司馬仙取賊馬二即斬以徇坊人

之遠者宿昔乃知王師之入也長安之人不識旗鼓又露布至梁帝感泣羣臣上壽且言

鼠蕩夷兇慙而市不易廛宗廟不震長安整衆李光弼與九節

度圖安慶緒於相州諸將驚潰各引折逆旅七箸者即

歸所在剽畧獨光弼整衆還太原斬高崇文為左神策行營節度使卯漏受命辰已出師

斬以號令靜嚴

李靖蕭銑降靖入其都號令靜嚴軍無私焉

所過不敢伐桑

棗踐禾稼

宗室臯遷荆南節度使凡戰大小三十二師所過不敢伐桑棗踐禾稼

轉鬪陷

陣所向無前

劉仁軌百濟故將福信及浮屠道琛迎故王子扶餘豐立之引兵圍劉仁愿詔仁軌

統王文度之衆并發新羅兵為援仁軌將兵嚴整轉鬪陷陣所向無前

與諸將割臂盟

李嗣

業安祿山反肅宗追之詔至即引道與諸將割臂盟曰所過郡縣秋毫無可犯

瓶壘不發

陽惠元田

悅增河上兵河南大擾詔移兵萬二千戍關東帝御望春樓誓師因勞遣諸將酒至神策將士不敢飲帝問故惠元曰初發奉天臣之帥張巨濟與衆約是役也不立功毋飲酒臣不敢食其言既行有饋於道惟惠元軍瓶壘不發帝整飭諸邏

李觀為右龍武將軍涇師叛觀適番上即領兵千餘扈德宗奉天詔

咨嘆不已

盡察諸軍整飭諸邏增募五千人聲譽譙賢士氣益振

盛夏號令若負霜雪

李密持軍

嚴雖盛夏號令若負霜雪

檢軍

令狐彰拜滑毫魏博節度使躬訓吏下檢軍力農法令嚴無敢犯者

治

謹于法下有犯雖毫髮比不肯貸

辛雲

袍仗精整

楊洪禮太

宗征遼東拜兵部侍郎帝嘗自山下望其衆袍仗精整人人盡力壯之曰越公兒郎故有家風

所過樵

蘇無犯

李晟拜神策行營節度使進臨渭北壁東渭橋所過樵蘇無犯

法令嚴整

牛存節為

將法令嚴整而善得士心路人送者皆號泣

嘆法令嚴

五代安巴堅會天大雪契丹人馬飢寒多

死安巴堅顧盧文進以手指天曰天未使我至此乃引兵去莊宗攝其後見其宿處環桔在地方隅整然雖去

而不亂嘆曰彼法

自齋糧所過無秋毫犯

令狐彰吐蕃盜邊台防秋

兵彰遣士三千自齋糧所過無
秋毫犯供擬讓不受時題其能
整衆山立無秋毫犯王雄

誕每破城邑整衆
山立無秋毫犯

謀畧十一

白萬人之敵 運神筭 善計 先知 獨見 獨斷

吳用子胥之謀入楚以三帥隸之 君請子畫畫計策

用於戰勝則無敵禮 七擒七縱諸葛亮 百戰百勝武安君 六

出奇謀陳平 決勝運籌高祖曰運籌帷幄之中決勝千里之外吾不如子房 龍韜豹

畧 拔幟之計韓信攻井陘 劍術無前 碩畫大畧 制勝於廟

美遠畧使與曳柴而偽遁樂枝先人有奪人之心軍之善

謀也相時而動專謀知戰觀釁而動中權後

勁其何不濟以奇用兵老臨難制變王兵先勝而

後戰文有征無戰出奇於術內制勝於殺中借箸一當萬

晉杜元凱有滅吳計語成百克之計定一舉軍要兵善

計潛行破勅敵於奇謀獨運解重圍於運謀戎伐謀伐

以謀受成成兵苟未知兵何以智合於權義和料敵

曳柴之謀破竹之勢將執律以嚴終在運籌能軍之畧視

其轍亂望其旗靡故逐之

曹劌曰大國難測懼有伏焉傳

無扞採樵者

楚伐狡莫故曰狡小而輕請無扞採樵者以誘之

帝王之兵貴謀賤戰戰不

必勝

不苟接刃

趙充國云

置之死地而後生

韓信攻趙背水為陣曰今

驅市人而戰故置之死地使人人自為戰也

先聲而後實

廣武君李左車曰軍固有先聲而後

實

左實右偽以旆先

右以衣物為人形晉侯伐齊平陰時

滅鼃

孫臏伐龐涓

增

鼃

後漢虞詡升卿為武都守羌遮陳倉詡日夜行令士各作兩鼃曰增倍羌見吾益倍必謂有郡兵來昔孫

臆示弱今吾示強羌果畏而不敢逼

策慮愒愒

漢陳易字公子

不學古兵法

帝使霍去

病學孫吳故法曰顧方畧何如爾不至學古兵法

百聞不如一見

上問趙充國伐羌何如用

幾人克國曰百聞不如一見兵難踰度尚為荊州度踰遙也臣願馳至金城圖上方畧焚營以士卒驕不

肯戰密焚其營清嘯胡笳劉琨越石嘗為胡騎所圍窘珍寶遂破賊迫無計乃乘月登樓清嘯賊

聞之悽然中奏胡笳賊又流涕攻其急以擊疑因其虛向曉復吹之賊並棄圍而走而止散

利以誘之取亂而孔與帝意合裴度視行營奏攻誅易之

兄弟朱敬則初二張權寵盛敬則密謂敬暉曰公若假太子令舉北軍誅易之兄弟兩飛騎力爾敬暉卒

用其康日知少事李惟岳擢累趙州刺史惟給為臺檢岳叛日知與別駕李程及部將百人啐

牲血共盟固州自歸惟岳怒遣先鋒兵馬使王武俊攻之日知使客謝武俊曰賊孱甚安足共安危哉吾城固士和雖引歲未可下且賊所恃者田悅耳悅兵血磯邢壕可浮不能殘半堞況吾城之完乎又給為臺檢示曰

使者齋詔諭中丞中丞奈何負天子從小兒跳梁哉武
俊悟引兵還斬惟岳以獻德宗美其謀擢為觀察使

乘機決策

韓克乘機決策無餘悔世推善將

咨逮戎畧

鄭雲遠李晟表以禮部侍郎為

軍司馬時時

裴度

李師道怙強度密勸帝誅之乃詔四
咨逮戎畧節度會田弘正致討弘正請自黎陽

濟合諸節度兵度曰魏博軍度黎陽即叩賊境封畛比
聯易生顧望是自戰其地弘正光顏素少斷志盤桓果
不可用不如養威河北須霜降水落絕陽劉深抵鄆以
營陽穀則人人殊死賊勢窮矣上曰善詔弘正如度言

凌敬說建德三利

竇建德諸將新破海公掠獲盈給日
夜思歸凌敬說建德曰今唐以重兵

圍東都守虎牢我若悉兵濟河取懷州河陽以重將成
之然後鳴鼓建旗踰太行入上黨傳檄旁郡進壺口以
駭蒲津收河東地此上策也且有三利乘虛搗境師有
萬全一也拓土得衆二也鄭圓自解三也建德怒命扶

出果

莫測其謀

董晉為宣武節度大使李萬榮死鄧惟恭總其軍晉受命不召兵惟幕府驍傑

從之即日上海至鄭逆者不至人勸止以觀使宜晉不聽直造汴及郊惟恭始出迎謁既入即委以軍政無所

改更莫

定襲蔡謀

李愬為隨唐鄧節度使吳秀琳舉文城柵降愬單騎抵柵下與語親釋縛

以為將秀琳為愬策曰必破賊非李祐無與成功者祐

賊健將也守興橋柵其職嘗易官軍愬候祐護獲于野

遣史用誠以壯騎三百伏其旁見羸卒若將燔聚者祐

果輕出用誠擒而還諸將素苦祐請殺之愬不聽以為

客待間名祐及李忠義屏人語至夜艾忠義亦賊將所

謂李憲者軍中多諫此二人不可近愬待益厚乃募死

士三千人為突將自教之

平賊策

韓文臣有平賊策狂童不難治其言簡且

由是始定襲蔡之謀矣

要陛下
幸聽之
戈迴白日 劍薄雲天

天街之北旄頭已落絕轡之野蚩尤未縛俾我元侯

恢弘遠畧終取單于繫之

雄畧動如神

杜甫

李愬入蔡州

張柴礮其成勅士少休益治鞍鎧發刃鼓弓會大雨雪
天晦凜風偃旗裂膚馬皆縮慄士抱戈凍死于道張柴
之東坡澤阻與衆未嘗蹈也皆謂投不測始發吏請所
向愬曰入蔡州取吳元濟士失色監軍使者泣曰果落
祐計然業從愬人人不敢自為計愬道分輕兵斷橋以
絕洄曲道又以兵絕朗山道行七十里夜半至懸瓠城
雪甚城旁皆鵝驚池愬令擊之以亂軍聲賊恃吳房朗
山戍晏然無知者祐等坎墉先登衆從之殺門者發關
留持柝傳夜自如黎明**兵機事以速為神**李靖蕭銑據
雪止愬入駐元濟外宅**江陵武德四**
年大閏兵夔州時秋潦濤潮漲惡銑以靖未能下不設
備諸將亦請江平乃進靖曰兵機事以速為神今士始
集銑不及知若乘水傳壘是震霆不及掩耳**機不可失**
有能倉卒召兵無以禦我此必擒也銑降

同上頡利走保鐵山遣使者謝罪又遣鴻臚卿慰撫靖
謂副將張公謹曰詔使到虜必自安若萬騎齎二十日
糧自白道襲之必得所欲公謹曰上已與約降行人在
彼奈何靖曰機不可失韓信所以破齊也如唐儉輩何
足惜哉督兵疾進行遇候邏皆俘以從去其**置酒城上**
牙七里乃覺部衆震潰斬萬餘級頡利亡去張守珪為
虜奄至衆失色守珪曰瘡痍之餘詎可矢石相礮須權
以勝之遂置酒城上會諸將作樂虜疑有備不敢攻引
去守珪縱兵擊敗之

女子舞

紫紹吐谷渾党項寇邊勅詔討之彼據高射紹
軍雨矢士失色紹安坐遣人為彈琵琶使二女

子舞寇疑之休射觀紹伺其懈以精騎從後掩擊寇大潰斬首五百級

兵尚權權利於速

裴寂封聞喜縣公至河東屈突通未下而三輔豪傑多
歸者唐公欲先取京師恐通倚其後猶豫未決寂說曰

今通據蒲關未下而西我腹背支敵敗之符也不若破通而後趨京師秦王曰不然兵尚權權利於速今乘機度河以奪其心通自守賊耳庸能患我一失其機勝負未可計也唐公兩從之留兵圍蒲而遣秦王入關士

夜艾而入

李希烈據汴滑副都統劉洽率曲環李克信軍十餘萬戰白塔不利夜入宋州時洽將高

彥昭劉昌共嬰壘分守其屬作書言城且危彥昭視曰君輕我耶取紙自為書洽得書喜曰健將在西吾何憂選士八百夜艾而入賊不知兵詭道也難豫言

盛彥師與史萬

詰旦傳城士奮出希烈大敗寶鎮宣陽李密叛萬寶謂彥師曰密驍賊也以王伯當輔之挾思東歸之士非計出萬全不為也殆不可當彥師笑曰請以數千兵為公梟其首萬寶問計答曰兵詭道也難豫言即引眾踰洛水入熊耳山命士持滿夾道伏短兵溪谷間令曰賊半渡乃擊所部皆笑曰賊移洛州何為備此彥師曰密聲言入洛其實走襄城就張善

相我據其要必擒之密果至彥師
橫擊首尾不相救遂斬密及伯當
可與計勝梁與晉爭德威從莊

宗于河上莊宗問戰對曰此去汴州信宿而近梁軍父母妻子皆在其中而梁人家國係此一舉吾以深入之兵當其必死之戰可以計勝而難與力爭也且吾軍先至此糧爨具而營柵全是謂以逸待勞王宜按軍無動而臣請以騎軍擾之使其營柵不得成樵爨不暇給因其勞乏而乘之可以勝也莊宗速督軍而出德威謂其子曰吾不知死所矣父子皆戰死五代晉臣周德威傳
孟方立為昭義節度使晉遣李克修出兵方
立以孤城自守方立將石元佐者善兵而多智為晉將安金俊所得金俊厚遇之問以攻邢之策元佐曰方立善守而邢城堅若攻之必不得志宜急攻磁州方立來救可以敗也金俊以為然軍于湓水之西方立果帥兵來救為金俊所敗馳入邢州閉壁不復出外無救兵城中食且盡方立夜出巡城號令守者守者皆不應方立

知不可乃歸
飲酖而卒

其伐南唐問宰相李穀以計策後克淮南

出穀疏使學士陶穀為贊而盛以錦囊嘗置之坐側

五代

本紀周
世宗贊

上平戎十八策

王忠嗣時突厥新有難忠嗣進
軍磧口經畧之烏蘇米施可汗

請降忠嗣以其方強特文降耳乃營
木刺蘭山謀虛實因上平戎十八策

出奇兵襲敵

軍中
士氣

盛日夜思戰忠嗣縱詭間伺虜隙時出
奇兵襲敵所向無不克故士亦樂為用

隧地擒取

李光
弼入

太原思明為飛樓障以木慢築土山臨城光弼遣穴地
墮之思明宴城下倡優居臺上靳指天子光弼遣人隧

地擒取之思明大駭從牙
帳遠去軍中皆視地後行

論軍旅勝負

思明乘勝西嚮
光弼敦陣徐行

趨東京謂留守韋陟曰賊新勝難與爭鋒欲誅之以計
然洛無見糧危偏難守公計安出陟曰益陝兵公保潼

關可以持久光弼曰兩軍相敵尺寸地必爭今委五百里而守關賊得地勢益張不如移軍河陽北阻澤潞勝則出敗則守表裏相應賊不得西此猿臂勢也夫辨朝廷之禮我不如公論軍旅勝負公不如我陟不能答

高仙芝

會連雲堡拔其城仙芝欲遂深入引師行三日過垣駒嶺峻絕下四十里仙芝恐士憚險不

敢進乃潛遣二十騎衣阿弩越胡服來迎先語部校曰阿弩越胡來迎我無慮矣既至士不肯下曰公驅我何去會二十八人至曰阿弩越胡來迎已斷娑夷橋矣仙芝即陽喜令士盡下娑夷河弱水也既行三日越胡來迎明日至阿弩越城遣將軍席元慶以精騎一千先往謂小勃律王曰不窺若城吾假道趨大勃律爾城中大酋領皆吐蕃腹心仙芝密令元慶曰若酋領逃者第出詔書呼之賜以繒綵至皆縛以待我元慶如言仙芝至悉斬之王及妻逃山谷不可得吐蕃入寇詔問計郭子儀仙芝招諭乃出降因平其國

恩誘吐蕃回紇黨項數十萬入寇朝廷大恐詔子儀屯奉天帝問計所出對曰無能為也懷恩本臣偏將雖慄果然素失士心今能為亂者誠思歸之人劫與俱來且皆臣故部曲素以恩信結之彼忍令以刃相向乎帝曰善

沈毅有謀

李抱玉

柴孝和說李密曰

秦地阻山帶河項背之亡漢得之王

今公以仁基壁回洛翟讓保洛口公東鎧保道趨長安百姓誰不郊迎是征而不戰也眾附兵彊然後東向指搗豪傑天下靡然無事矣今遲之恐為人先密曰僕懷此久顧我部皆山東人今未下洛安肯與我偕且諸將皆羣盜不相統一使賊不及計薛仁果初仁果降諸將敗則掃地矣遂止賀且問曰羅睺雖破而賊城尚堅王能下之何也秦王曰羅睺健將非急追之使得還城未可取也故吾使賊不及計是以克之諸將皆以智筭取之魏元忠儀鳳中吐蕃數盜邊元忠封事服以智筭取之言命將用兵之要曰必其戰不顧死則

兵法謂敵能鬪當以智
算取之何憂不克哉

劉昌裔

吳少誠引兵薄城兵馬
使安國寧謀應賊昌裔

以計斬之召其麾下千人為饗人賞二緡乃
伏兵于道令持緡者斬一不能脫賊聞解去
載嬰兒唬

譟下堡

羅士信次洛陽攻千金堡有惡言詢軍士信怒
夜遣百人載嬰兒唬譟下堡若自東都出犇者

既而陽悟曰非也此千金堡耳因散去
堡兵開門追掠士信伏入屠之無類

下令穀熟收以

饋軍

龐王為梁州總管巴山獠叛王梟其首餘黨四奔
屬縣獠與反者州里親戚為賊游說言不可窮躡

王不聽下令軍中曰穀熟吾盡收以饋軍非盡賊吾不
反聞者懼相謂曰軍不止吾穀盡且餓死乃共入賊營

所與親相結斬渠
長以降眾遂潰

謀畫多中

五代敬翔梁太祖與蔡人
戰汴郊翔時時為太祖謀

畫多中太祖欣然
以為得翔之晚

取其軍號

吳越錢鏐楊渥將周本陳
章圓蘇州鏐遣其弟鋸鏐

救之淮兵為水柵環城以銅鈴係網沉水中斷潛行者
水軍卒司馬福多智而善水行乃先以巨竹觸網淮人
聞鈴聲遽舉網福乃過入城中其出也亦然乃取其
軍號內外夾攻號令相應淮人以為神遂大敗之 猶

豫兵家大忌

敬塘其姓石氏趙在禮之亂明宗討之至
魏而兵變敬塘獻計曰豈有軍變於外上

將獨無事者乎且猶豫者兵家大忌不如速行願得騎
兵三百先攻汴州夷門天下之要害也得之可以成事

明宗然之與之驍騎三百渡黎陽為
前鋒明宗遂入汴五代史晉本紀

閉壘示怯

王景仁
梁太祖

遣子友寧攻王師範于青州師範乞兵於行密行密遣
景仁以步騎七十救師範大敗之遂斬友寧是時梁太
祖方攻鄆州聞友寧死以兵二十萬倍道而至景仁閉
壘示怯伺梁兵急毀柵而出馳驅疾戰戰酣退坐召諸
將飲酒已而復戰太祖登高望見之得青州絳人問飲
酒者為誰曰王茂章也太祖歎曰使吾得此人為將天

下不足平也梁司馬宣王征孟達則八道急攻公孫文

懿則捨其銳而趨其虛

文粹吳武陵上韓舍人行軍書夫臨機制變又何可數昔司馬

宣王征孟達則八道急攻公孫文懿則捨其銳而趨其虛緩以撓各從其利也決策九重定計

千里

陸宣公奏議鋒鏑交於原野而決策於九重之中機會變於斯須而定計於千里之外

巨謀

纖計

杜牧

備東則撓西備西則撓東

五代周臣王朴獻平邊策曰攻取之道從

易者始當今惟吳易圖東至江可撓之地二千里從少備處先撓之備東則撓西備西則撓東彼必犇走以救其弊犇走之間可以知彼之虛實衆之強弱攻虛擊弱則所向無前矣勿大舉但以輕兵撓之彼人怯弱知我師入其地必大發以來應數大發則民困而國竭一不大發則我獲其利彼竭我利則江北諸州乃國家之所

有也既得江北則用彼之民揚我之兵江之南請哥舒亦不難而平之也如此則用力少而收功多

翰固關無出軍

哥舒翰當是時祿山雖盜河洛所過殘殺人人怨之淹時月不能進尺寸地又

郭子儀李光弼兵益進取常山十數郡祿山始悔反矣將還幽州以自固而國忠計迫繆說帝趨翰出潼關復陝洛時子儀光弼遙計曰翰病且耄賊素知之諸軍烏合不足戰今賊悉銳兵南破宛洛而以餘衆守幽州吾直擣之覆其巢窟質叛族以招逆徒祿山之首可致若師出潼關變生京師天下殆矣乃極言請哥舒翰固關無出知機而不知權者得於預謀失於臨事知權而不知機者巧

於臨事拙於預謀馮用之權論

料敵十二

白懼而增德不可當也

趙簡子謂孟明

彼見吾貌

必有懼心

郭嘉料

孫策

魏志孫策轉鬪千里盡有江東聞太祖在官渡將襲許眾懼郭嘉料之曰孫策新并江東所誅者英

髦雄傑輕而無備雖有百萬眾無異獨行中原若刺客伏起一人之敵爾必死匹夫之手策臨江為許貢客所

殺

漢高問魏將是誰

曰栢直乳臭不能當灌嬰步將項佗不敢雖賢不能當

能當曹參

屈指

魏志諸葛亮攻陳倉帝問張郃曰將軍到亮無得陳倉乎郃曰比臣未到亮已

走屈指計亮糧盡不至十日郃晨夜至鄭亮果退

聚米

後漢馬援於帝前聚米為山谷指畫形勢開示

眾所從道昭然可曉

成擒

袁尚救鄴諸將以尚歸鄉人帝曰虜在吾目中

從大道來則當避之若循西山來成擒矣果循山臨釜水為營公擊破之

先勝後戰

魏文帝欲伐不

從命吳蜀何先賈詡曰吳蜀依山阻水劉備有雄才諸葛亮善治國孫權識虛實陸遜見兵勢皆難卒謀用兵之道先勝後戰量敵論將臣以今宜先文後武不從江陵役士多死也見可而進知難而

退軍之善謀先開賞募

山賊陳策衆數萬人太祖問可伐否劉曄曰策因亂赴險相依

為強非有爵命威信相伏畏死取賞愚智所同先潘濬

請以五千人擒樊仙

吳志樊仙誘導諸夷以圖武陵孫權問潘濬濬曰五千兵足以擒仙

權曰卿何輕之濬曰仙嘗為州人設食至日中食不可得而十餘自起亦侏儒一節之驗權大笑以五千人授

潘果斬仙也

口對手畫

張千秋與霍禹隨度遼將軍烏桓還謁大將軍霍光問方畧形勢千秋口

對兵事手畫地成圖無所失孔圖上河北險要

李吉甫請任薛

平為義成軍節度使以重兵控邢洛因圖上河北險要
所在帝張於浴堂門壁每議河北事必指吉甫曰朕日
按圖信如料敵如神韓充為義成軍節度使會汴軍逐
李愿以李芥主留事帝遣人問破
御料矣賊期充對曰汴天下咽喉臣頗習其人然王師臨
之一月可破方二旬即克帝喜曰充料敵如神不十
五日破賊韋表微戶部侍郎升志詔叛詔李聽率師討
之次河上天子憂無成功表微曰以聽軍勢
不十五日必破賊及捷書上止決日所謂料敵者何定乎得失之計始可
兵出而決於勝負矣
當料彼將吏孰與已和止客孰與已逸排甲孰與已堅
器械孰與已利教練孰與已明地勢孰與已險城池孰
與已固騎畜孰與已多糧儲孰與已廣工巧孰與已能
秣飼孰與已豐資貨孰與已富以此揣而料之焉有不
保其勝哉通北取三關兵不血刃而史家猶譏其輕社
典兵料敵

稷之重而僥倖一勝於倉卒殊不知其料彊弱較彼我而垂述律之殆得不可失之機此非明於決勝者孰能

至哉誠非史氏之所及也

周世宗本紀

救敗之師

李靖九月蕭銑將文

士弘以卒數萬屯清江王考恭欲擊之靖曰不可士弘健將下皆勇士今新失荆門悉銳拒我此救敗之師不可當宜駐南岸待其氣衰乃取

料敵明

李靖贊曰臨機果料敵明根于

忠料敵應變

李勣用兵多籌算料敵應變皆契事機

噫鳴咄嗟足以驚敵

李密楊玄感嘗私密曰上多忌隋歷且不長中原有一日警公與我孰後先密曰決兩陣之勝噫鳴咄嗟足以

驚敵我

出其意外

杜牧宰相李德裕奇其才會昌中黠戛破回鶻回鶻種落潰入漠南牧說

德裕不如遂取之以為兩漢伐虜常以秋冬當匈奴勁
弓析膠重馬免乳與之相校故敗多勝少今若以仲夏
發幽并突騎及酒泉兵出其意外一舉無類矣
王峻上言王峻進并州都督長史明年突厥默啜為
拔曳固所殺其下多降分置河曲既而小殺繼降降者
稍稍叛去峻上言突厥向以國亂故款塞與部落無間
延僚北風何嘗忘之今徒處
討勃律李嗣業高仙芝討勃律署嗣業及中
郎將田畛為左右陌刀將從平石國初仙芝特以計襲
取石其子出犇因結諸胡共怨之以告大食連兵攻四
鎮仙芝率兵二萬深入為大食所敗殘卒數千事急嗣
業謀曰將軍深履賊境後援既絕而大食乘勝諸胡銳
于鬪我與將軍俱前死尚誰報朝廷者不如守白石嶺
以為後計仙芝曰吾方收合餘燼明日復戰嗣業曰事
去矣不可坐須須
料內以敵外郭元振大將論欽陵請
醢即馳守白石
罷四鎮兵救十姓之地

乃以元振充使因覘虜情還上疏曰善為國者平川廣

野騎兵所長

周德威告莊宗曰梁兵甚銳未可與爭宜少退以待之莊宗曰吾提孤軍出千里其

利速戰今不乘勢急擊之使敵知吾之衆寡則吾無所施矣德威曰不然趙人能城守而不能野戰吾之取勝

利在騎兵平川廣野騎兵之所長今吾軍於河上追賊營門非吾用長之地也莊宗不悅五代史因其

將退而擊

至于鄆南兩軍皆陣梁軍橫亘六七里汴宋之軍居東魏滑之軍居西莊宗策馬登高望

而喜曰平原淺草可前可却真吾之勝地也乃使人告德威曰吾當為公先公可繼進德威馳馬諫曰梁軍輕

出而遠來與我轉戰其來必不暇齎糧糗縱其能齎亦不暇食不及日午人馬俱饑因其將退而擊之勝諸將

亦皆以為然至未申時梁軍東偏塵起德威鼓譟而進麾其西偏曰魏滑軍走矣又麾其東偏曰梁軍走矣梁

陣動不可復整乃皆走遂大敗自鄆追至于柏鄉橫尸
數十里自梁與晉爭凡數十戰其大敗未嘗如此同上
因其勞乏而乘之
宿湖柳陂黎明候騎報曰梁軍至矣
莊宗問戰於德威德威對曰此去汴

州信宿而近梁軍父母妻子皆在其中而梁人家國繫
此一舉吾以深入之兵當其必死之戰可以計勝而難
與力爭也且吾軍先至此糧饟具而營柵全是謂以逸
待勞之師也王宜按軍無動而臣請以騎軍擾之使其
營柵不得成樵爨不暇給因其勞乏而乘之可以勝也
莊宗曰吾軍河上終日俟敵今見敵不擊復何為乎顧
李存審曰公以輜重先吾為公殿遽督軍而出德威謂
其子曰吾不知死所矣前遇梁軍而陣莊宗率銀鎗軍
馳入梁陣德威**決勝料勢決戰料情**
閻寶梁晉戰胡柳
父子皆戰死
兵退保臨濮寶曰大決勝料勢決戰料情情勢既得斷
在不疑今梁兵窘蹙其勢可破勝而驕怠其情可知此

不可失之勢也莊宗謝曰微公幾敗乘其馳突必欲驅

除豈可蓄虺穴于塞垣養蠱毒于懷袖乘其馳突必欲

驅除昔晉侯報楚之功避子玉於三舍先軫捨秦之

惠覆孟明於二嶠安國庇人大遠揣羌情終難保信去昔

義斯在一品集賜劉沔密詔

病深入大漠亦殄獯戎近李靖再襲必不遊奕伏道回緣

穹廬始擒頡利一品集賜張仲武詔

鵠皆是騎兵長於野戰若在靖難以交鋒雖良將勁卒

無以制勝比聞戎虜不解攻城則知除馬上馳突其他

並不慣習臣伏料必不遊奕伏道又不會斫營儻令石

雄以義武馬軍一千騎兼揀退渾精選步卒以為羽翼

衛牧夜襲必易鬪羊王君奐破吐蕃於西說策其且敗

成功一品集因上舊州鬪羊於帝以申諷諭曰

使羊能言必將曰鬪而不解立有死者所方陣而罵李

賴至仁無殘量力取歡焉帝識其意納之

弼賊帥周擊攻北城光弼敕軍入登陣望曰
彼軍雖銳然方陣而囂不足虞也日中當破
引衆踰洛

水入熊耳一山

盛彥師授行軍總管從平京師與史萬寶等鎮宣陽李密叛謀出山南萬寶問

計答曰兵詭道也難豫言即引衆踰洛水入熊耳一山
命士持滿夾道伏短兵候谷間令曰賊半渡乃擊所部
皆笑曰賊移洛州何為備此彥師曰密聲言入洛其實
走襄城就張善相我據其要必擒之密果至彥師橫擊
首尾不相救遂問破敵之期王彥章龍德三年夏晉取
斬密及王伯當問破敵之期王彥章對曰三日
討使以段凝為副使末帝問破敵之期彥章對曰三日
左右皆失笑彥章受而出馳兩日至滑州置酒大會陰
遣人具舟於楊村會甲士六百人皆持巨斧載冶者具
輔急乘流而下彥章會飲酒半佯起更衣引精兵數千
沿河以趨德勝舟兵舉鎗燒斷之因以巨斧斬浮橋而
彥章引兵急擊南城浮橋斷南城遂破蓋三日矣五代

史 八人之國利在速戰

康延孝莊宗征蜀以延孝為先鋒排陣斬斫使破鳳州取固鎮

降興州與王衍戰三泉衍敗走斷吉柏江浮橋延孝謂招撫使李嚴曰吾遠軍千里入人之國利在速戰乘衍破膽之時但得百騎過鹿頭關彼將迎降不暇若修繕橋梁必留數日使衍得閉關為備則勝負未可知也因與嚴乘馬浮江軍士隨之濟者千餘人羣下伏其料敵遂入鹿頭關下漢州居三日後軍始至

江南野史

劉仁瞻

白孔六帖卷五十二